



WWW.BOOKS4ALL.NET

https://www.facebook.com/books4all.net



Second Second

ر الشعبيدية موسوسيوسيوه

الماء

الى جندى قتل في سيناء

سعد الدين وهبة

الشخصيات

رضـوان	۔ حارس المقابر
رشــوان	ــ جندی شرطة
نرجس	ــ مومس
عبد الففار	_ نفر قتل في سيناء في يونيه سنة ١٩٦٧
خميس	 نفر قتل فی سیناء فی یونیه سنة ۱۹۲۷
محروس	_ نفر قتل في سيناء في يونيه سنة ١٩٦٧
شىوقى	۔ نفر قتل فی سیناء فی یونیه سنة ۱۹۲۷
رمضان	_ نفر قتل في سيناء في يونيه سنة ١٩٦٧
عبد العال	_ نفر أصيب في سيناء ومات في القاهرة ١٩٤٨
عبد الواحد	_ قتل في فارسكور أثناء مقاومة الصليبيين
عويس	_ قتل في معركة التل الكبير تحت قيادة عرابي
محمود	_ قتل في معركة التل الكبير تحت قيادة عرابي
عوضين	 قتل في المنصورة وهو يحارب ضد لويس
نبيل	قتل فی بور سعید ۱۹۵۲
بيسومي	_ قتل في ميدان الأزهر عام ١٩١٩
عبد الرؤوف	 قتل في القنال عام ١٩٥٣
محفوظ	۔ قتل غَرقا فی حادث کوبری عباس ۱۹۶۲

شخصيات من التاريخ

احمد عرابی ۔ عبد الرحمن الجبرتی ۔ سلیمان الحلبی ۔ ابراهیم الوردائی ۔ مصطفی البشتیل ۔ عدنان المدنی

شخصيات اخرى

المامور - الحكمدار - الطبيب الشرعى - مدير التحرير - محرر - مدير الاعلانات - المحقق - فريد - عصام - ومحمود - وصبحى - وعبد الجليل - مثقفون - المذيعة - المثلة السينمائية - العمدة - المخبر - رجال - فتيات - شبان - شيخ - معلم - جنود - اموات

اللوحة الأولى

المنظسر:

(مقابر الامام الوقت قبل منتصف الليل ـ الجو بارد جدا ـ في خص بجوار أحد المقابر يجلس خفير القسابر رضوان وأمامه المسكرى رشوان بينهما (ركية) نار)

ـ بيقولوا الرؤية ما سبتتش يا شاويش رشوان	رضـوان
_ لأ المفتى طلع بذات نفسه فوق البرج وبص	رشـوان
في كل حته في السما ماشافش حاجه	
_ یعنی صایمین صایمین بکره	رضـوان
ـ أيوه كل سنة وانت طيب يا عم رضوان	رشسوان
_ وانت طيب بس الأكاده أنا قلت للوليــه	رضـوان
بلاش سحور الليلة	
_ وتصبح صايم من غير سحور	رشسوان
_ كله بثوابه .	رضـوان
ـ أنا لو ماكنتش زى ما انت عارف ما أقدرش	رشسوان
أسيب الوردية كت رحت جبت لك سحور	•
ـ تعیش بس یعنی حکایة الهلال دی مالهاش	رضـوان
_ حلها أيه ماهو لازم الشبيخ يشوف بنفسه الهلال	رشسوان
٠٠ الشرع كده ٠٠	
۔ هم مش قالو (عندهم عدد وحاجات تشرف	رضوان
الهلال قبلها بيومين تلاته	

_ أيوه فيه أنما المسألة ماتبقاش شرعية ألا أذا رشوان الشيخ شاف بنفسه _ طب وهو الشميخ لما بيطلع المدنة والا البرج رضـوان بيشوف بايه مش بعدد برضه _ نضارة معظمة رشوان _ طب نضارة بنضارة ما يسمعوا بقى كلام العدد رضوان اللي بتشوفه قبلها بيومين تلاته بدل ما ياخدوا الناس على غفلة _ برضه ما يبقاش شرع أقولك زى أيه ؟ زى الدبح رشوان _ الدبح رضوان رشوان _ أيوه دبح الطير والا لا مؤاخذة الحيوان هو الدبح يبقى حلال الا لما تسمى وانت بتدبح Y land _ رضـوان رشسوان _ أهى دى زى دى ... _ زیها ازای طب ماهم بیقولوا انهم شافوا الهلال رضـوان هناك في مكة ولا في أبصر أيه نبقى كأننا شفناه _ طب ماهو لو واحد مسلم غيرك سمى على الدبح رشـوان يبقى حلال . . ـ والله برضه مظبوط یا شاویش رشوان ... رضوان فوق کل ذی علم علیم برضه ... (تدخل نرجس وهي ترتعد من البرد تجلس وتمد يدها على النار) ــ سالخير عليكم ... نرجس رشــوان _ ایه اللی جابك بابت الساعة دی ... نرجس _ رجلیــه ...

رضسوان	_ احنا مش قلنا بلاش في رمضان
نرجس	۔ ما رمضان راح خلاص یا عم رضوان
رضـوان	لا لسه فيه بكره
نرجس	ــ أنا عارفه بقى أنا كت فاكراه حيخلص
	النهاردة
رشـوان	_ ويعنى كت مستنية ع الآخر
نرجس	_ مش اكل عيش يا شاويش رشوان والا يعنى
	أموت م الجوع بس كفايه شهر بحاله أهوه
	مدخلیش قرش مصدی
رضـوان	دا شهر مفترج یا نرجس ما تعیطیش
نرجس	_ أنا قلت حاجه بس هو شهر مفترج على ناس
	تانيين انما على أنا شهر وقف حال
رضـوان	 انتی جایه لیه داوقتی
نرجس	ــ ما قلت لك كت فاكره رمضان آخره الليلة
رشـوان	_ وطلع مش آخره الليلة
نرجس	_ يبقى أدنى شويه وأروح لحالى
رشـوان	ـ معاكيش سنحور
ترجس	ســحور
رشـوان	ــ أصل عم رضوان كان زيك فكره رمضان آخره
	الليلة ما جابش سحور معاه
نرجس	اروح اجیب لك
رضوان	_ مالوش لزوم ٠٠
نرجس	_ يعنى تصوم من غير السيحور
رضوان	ـ کله بثوابه
نرجس	 والنبی لانی جاببالك دا انت خیرك علی سابق

(تقوم نرجس وتسع مبتعدة) رضوان ــ تمالی بابت ... نرجس... تمالی (لا ترد وتخرج) _ سيبها خليها تروح رشـوان رضوان - یعنی اسحر من فلوس حرام یا شاویش رشوان رشـوان _ فكرك حترجع ... رضوان - لازم ... رشيوان أنا مش فاهم البني آدم دا أصله آیه . . . بعنی حد يجيله نفس يعمل الحكاية دى في الترب . . ـ وهو ربنا بيسيبهم دا الميتين لها حرمة برضه رضيوان (يسمع صوت خناق وتدخل الى المسرح نرجس وهي تمسك بشاب يرتدى ملابس عسسكرية ممزقة وهو مبتور النراع وخلفه اربعة عساكر احدهما مشوه والآخرون بهم جراح مختلفة وملابسهم معزقة) . _ تعالى هنا ... قوم يا شاويش رشوان شوف نرجس حكايتهم اله ؟ _ عملوا ایه دول بایت رشـوان هجموا عليه وكانوا حيموتوني . . نرجس (يهم الجندى الذي تمسك به نرجس أن يتكلم ولكن الشاويشوقد أخذ سمت المحقق يشير اليه بيده أن يكف) _ استنى انت (لنرجس) ايه اللي حصل رشــوان بالمظبوط ... _ أنا بعد مامشيت بشويه لقيت الجدع ده راح نرجس طالع لى من ورا التربة اللى هناك داهيه وراح هاجم علیه خلصت نفسی منه وجریت راحوا

طالعين دول (تشير الى الجنود الأربعة) من ورا الترب وراحوا محاوطيني انما بقيت اصرخ ومارضيتش اسيبه من ايدى أبدا ...

۔ وکان عاوز منك ايه رضسوان _ (تتقصع في دلال) اسأله كان عاوز منى ايه ... نرجس ـ عاوز يسرقك يعنى والا رشـوان ـ ایش عرفنی اهو قدامك اهو ... نرجس _ انت یاجدع انت اسمك ایه ... رشوان _ عبد الففار محمود السيد عبد الففار _ عاوز ایه من الست دی رشـوان _ أنا مش عاوز منها حاجة أنا كت باسألها عن عبد الففار السكة _ سكة اله رشـوان _ سكة المدافن ... عبد الففار _ سكة . . سكة ايه اللي بيسألني عليها واللي نرجس يسألني يروح ماسكني بالحضن . .

- أنا سألتها عن السكة بس عبد الففار

> _ وعاوز ایه م السکة رشـوان

عيد الففار _ عاوز المدافن ... الترب ..

۔ تستخبی فیھا مش کدہ رشوان

> ــ أيوه عيد الففار

_ ما هو باين على وشك ... أنا أعرف أمثالك رشيوان على بعد ميت كيلو . . شوية عصبحية سرقتوا دكان ولا سرقتوا سريقة وجايين تستخبوا في الترب ...

_ دول متعورين ... رضوان _ لازم كانوا في الخناقة ... نرجس _ خناقة اله ا رشوان _ ظبطوا ناس كانوا بيسرقوا في شارع الأزهر نرجس وضربوا عليهم نار وحصل خناقة كبيرة قوى واتعور منهم ناس يامه ... _ يبقى هم دول ... انتوا مضروبين بالنار مش رشـوان كده . . . ــ أيوه . . . عيد الففار _ حلو . . والله واترقیت یا رشوان . . . رشـوان (يرفع البندقية ، ويشد الترباس ويوجهها اليهم) _ قدامي بقي من غير كلام .. رشـوان عبد الففار _ على فين _ ع القسم ... ع اللومان انشاء الله رشـوان _ احنا مش عاوزين نروح اللومان . . عبد الففار _ هو بكيفكم ... قدامي بلاش مناهده وخللي رشـوان لیلتکم تعدی علی خیر .. _ احنا عاوزين المدافن .. عبد الففار ـ یا جدع قدامی بلاش وجع راس رشـوان (الجندي يترك رشوان ويعود لزملائه فيلتفون حوله ويتحدثون في همس ثم يتقدم الجندي من رشوان) _ خلاص یاعم مش عاوزین ترب هنا . . احنا عبد الففار حنروح مدافن الخفير والا المدافن اللي في مصر الجديدة ... ـ ليه فكركوا الحكاية ايه فوضى ؟ بوظه ، قدامي رشوان منك له

۔ (تقترب من رشوان) حتسدینی کام بقی نرجس یا شاویش رشوان _ ادیکی ادیکی ایه ویمناسیة ایه رشوان ـ مش حتاخد مكافأة ... وأنا اللي جبتهم لك نرجس .. ما تقطعیش احنا لسه واقفین اههوه .. رشوان (للجندى) اخزى الشيطان وامشى قدامى انت وهوه ... _ قلنا لك حنروح جبانة تانيه عن اذنك عبد الففار (الجلدى يسسي في هدوء شديد وعندما يبلغ زملاءه ينضم اليهم ويولون ظهورهم للشاويش ويسيرون ، الموقف يتوتر جدا ... نرجس ورضوان يقفان خلف رشوان الذي يسترد قبضته على البندقية ويصيح وهو مضطرب) _ أقف عندك انت وهوه ... رشـوان (الجنود يسيرون وكأنهم لم يسمعوا) _ خطوه واحده وحاضرب في المليان .. رشـوان _ بلاش اذیه یا شاویش رشوان اعمل معروف . . رضوان رشـوان ـ واسبب مجرمين قتالين قتلا بهربوا .. ـ ایش عرفنا بس یمکن مظلومین رضـوان _ ومظلومين خايفين يروحوا القسم ليه رشـوان _ مظلومين ايه دول باين عليهم الشر والأذية نرجس _ خطوه واحده وحاضرب على طول رشـوان (الجنود يستمرون في السميم وفجأة يطلق دشوان البندقية طلقة ثم يتبعها بخمس طلقات ولكن أحدا من الجنود لا يسقط ولا يظهر أي اثر لاصابة أي منهم) ـ يانهار منيل دا ولا واحده صابت ... وكتاب رشـوان

الله أنا منشن كويس . . لم الفوارغ ياعم رضوان دى عهده

(رضوان ونرجس يجمعون الفوارغ ورشوان بين جمع الفوارغ والنظر الى الجنود وهو فى قمة اضطرابه وحيرته . الجنود توقفوا وهم الآن يستديرون ويتقدم اولهم . رشوان يتصور انهم سيهجمون عليه فيتراجع للخلف ويوهمهم بانه يعمر البندقية من جديد)

رشوان __ أقف عندك انت وهوه ... أنا لسه معيايه رصاص كتير ...

عبد الففار ــ ياعم احنا مالناش دعوه بيك احنا كنا جايين المدافن دى وبعدين انت قلت لا ، قلنا نشوف مدافن تانيه آدى الدور ... سلامو عليكم

(يحاول أن يستدير ولكن رشوان يصرح فيه)

رشـوان ـ اقف . . .

عبد الففار ـــ (وهو يتقدم ورشوان يتراجع) انت عاوز ايه بالمظبوط

رشوان _ لازم تروحو معایه القسم

عبد الففار _ ليه

رشوان ــ عشان انتوا متهمین فی قضیة وانا واجبی اقبض علیکم ...

عبد الففار ــ احنا مش متهمين في قضية ولا حاجه والحكاية اللي بتقول عليها دى احنا مانعر فهاش

رشوان ـ ایه اللی یثبت لی

عبد الففار _ احنا بنقولك أهوه ...

رشوان ــ تعالوا معايا القسم وهناك اثبتوا انكم مالكوش شان وهم يسيبوكم على طول

عبد الففار _ احنا مش عاوزين نروح القسم احنا عاوزين نروح المدافن (يستدير ولكن صوت رشوان يستوقفه) _ باقولك أنا معايه رصاص والبندقية اتعمرت .. رشيوان ـ احنا ما يهمناش الرصاص عبد الففار _ ليه بقى . . . محجبين . . . رشـوان عبد الففار ... لأ ... ميتين ... _ يبقى بتعترفوا انكم ميتين يعنى يا أموتكم أنا رشـوان يا تموتوا اعدام في المحكمة ... مش كده ... _ لا ... احنا متنا خلاص والرصاص اللي ضربته عبد الففار علينا جه فينا انما ماموتناش عشان احنا ميتين. ـ يعنى الرصاص اللي أنا ضربته جه فيكم ... رشـوان _ أبود عبد الففار رشــوان _ (بفرح) سمعت یا عم رضوان دا آنا نشانی مظبوط .. ست رصاصات في المليان .. ـ لا .. تلاته بس عبد الففار ـ الستة .. رشـوان _ تلاته بس . . واحده جت في ضهرى . . ووصلت عبد الففار للقلب والثانية جت في الجدع ده ... (يشبر على أحد زملائه) والتالته في الجدع ده (یشیر علی زمیل آخر) _ انت بتقول جاتلك الرصاصة في القلب .. رشوان

عبد الففار

رشسوان

ــ أيوه . .

۔ وما متش

ـ يا عم قلت لك احنا ميتين من زمان . . عبد الففار _ یعنی ایه میتین من زمان .. رشـوان _ احنا الخمسة كده متنا من سنة ونص واندفنا عبد الففار کمان .. ـ الله ... دى احلوت يا جدعان رشـوان (يتحرك الى المجموعة ويسير حولهم يتاملهم في عبث وسخرية) يا وعدى .. بقى انتوا الخمسة كده في عين العدو متم والدفنتوا كمان .. انتو بتشوفوا التليفزيون ؟ (يقف ويأخذ سيماء الجد) عبد الففار _ تلىغزىون رشـوان _ امال بتجيبوا الكلام ده منين .. _ (یقترب من رشوان) عبد المال ياعم رشوان احنا الخمسة زي ما بافولك كده متنا من سنة ونص واندفنا كمان . . _ ولما انتوا اندفنتوا بتدوروا على مدفن تاني ليه رشيوان .. سيبتوا الترب ليه طالعين تشموا هوا وراجعين طوالي .. _ احنا ماكناش مدفونين هنا . . احنا جايين عبد الففار نندنن هنا .. _ امال كنتوا مدفونين فين . . رشوان _ احنا كنا في سيناء من سسنة ونص ٠٠ متنسا عبد الففار والدفنا هناك ..

_ وايه اللي طلعكم بعد سنة ونص

(يتقدم جندي ثاني)

_ قلقنــا

رشـوان

عبد الففار

_ قلقوا منامنا خهيس ـ قلنا نندفن في أرضنا احسن . . محروس - طب ماهى هناك أرضنا برضه . . رشـوان ـ اصلهم طولوا قوى .. عبد الففار _ معلش طولوا قصروا دى ارضانا وحتفضل رشوان ارضينا .. _ الصراحة ماطقناش .. خميس ـ قلنا نندفن هنا مع أهلينا أحسن .. محروس (رشوان يفكر لحظة . ، نرجس تقترب منه) _ أنا ماشيه يا شاويش .. انما ماليش دعوه نرجس بالشورة دى .. (نرجس تسير مسرعة وهي تنظر الي الجنود في خوف.. رضوان يقترب من رشوان يهمس له) ـ الكلام ده مظبوط ... رضــوان ـ انا عارف . . أنا خلاص مخى اتلخبط . . رشيوان - ع العموم دول مش من بسبم الله الرحمن الرحيم رضوان .. أنا قريت آية الكرسي ولا ميت مره .. لو كانوا كده والا كده كان زمانهم انصرفوا ... ـ (يتقدم من الجنود) رشـوان وایه بقی اللی پثبت لی آن الکلام اللی بتقولوه مظبوط .. ۔ انت مش ضربت علینا بالنار عبد الففار ــ ابوه . . رشسوان عبد الففار ۔ وجت فینا .. ـ أبوه . . ر**شــوان** _ وما عملتش فينا حاجه .. عبد الففار

ــ أيوه . . رشوان ـ ليـه .. عبد الففار رشـوان ۔ ایش عرفنی . . _ عثبان احنا ميتين عبد الغفار رشـوان _ معقول برضه . . بس معقول ازاى . . هو الكلام ده برضه يخش المخ ... (بسمع صوت فرقعة ويخرج من قبر مجاور ميت يرتدي كفنا أسض) _ ایه الحکایة یا عم رضوان . . العسمکری ده عبد العال عامل الزيطة دى ليه .. (رضوان ورشوان يلتفتان اليسه .. رضوان في حالة اضطراب رشوان يتماسك ويسأله) _ وتطلع مين بقى حضرتك اللي مش عاجسك رشـوان العسكرى ده .. - أنا الميت اللي حظه النحس دفنه في التربة دي عبد العال اسمى عبد العال عبد الموجود ، وجاى حضرتك بالبندقية بتاعتك عشان تقلق منامنا بعد عشرين ـ انت كمان حضرتك ميت .. رشسوان _ أيوه ميت .. والجماعة دول ميتين قدامك عبد المال اهود . . ما بتشبوفش . . ـ بقى حضرتك ميت . . رشـوان _ من عشرين سنة .. عبد العال _ عم رضوان . . اعدلني ع القبلة . . رشـوان (يسقط رشوان) _ ســـــناد _

اللوحة الثانية

النظير:	
	(قسيم الشرطة مكتب المأمور
	المأمور يجلس الى مكتبه وأمامه ضابط برتبسة ملازم
	وبجواره تقف نرجس وفي الركن يجلس رضوان حارس
	المقسابر)
المأمور	۔۔ وبعدین یا نرجس
	_ وبعدين يا سعادة البيه راح هاجم على
	(يدق جرس التليفونويرفع المأمورالسماعة ويتحدث)
المأمور	_ ايوه يا أفندم لا يا افندم الطبب
	الشرعي راح يا أفندم التقرير حيوصلني حالا
	أبلغه لسيادتك فورا يا أفندم
	مع السلامة يا أفندم
	(المأمور يضع السماعة)
المامور	_ و بعد ين يا ترجس
ئرجس	_ وبعدين يا سعادة البيه راح هاجم على
	(يدق جرس التليفون ويرفع المأمور السماعة ويتحدث)
المأمور	ـ لا يا افندم لسه يا افندم اخطرناه
	يا افندم حاضر يا أفندم مساء النور
	یا افندم

(يضع المامود السماعة)

المامود ــ أيوه يا نرجس وبعدين . .

نرجس ــ بس يا سعادة البيه هو راح هاجم على . .

(يدق جرس التليفون ويرفع المامور السماعة) ـ تحت أمرك يا أفندم . . أبلغ سيادتك فورا المامور يا افندم . . حاضر يا افندم (يفيع السماعة) المأمور ۔ أيوه يا نرجس .. ـ بس یا سعادة البیه هو راح هاجم علی من هنا نرجس وإنا رحت . . (ويدق جرس التليفونويرفع المامورالسماعة ويتحدث) _ اشوفه حاضر یا افندم . . ما قدرتش احاول المأمور تانی با افتدم .. حاضر با افتدم (المأمور يضع السماعة ويحدث الضابط) _ هات رشوان .. المأمور (الضابط يحيي ويخرج) ـ ايوه يا نرجس قلتي ابه بقي المامور ـ بس يا سعادة البيه هو راح هاجم على من هنا . . نرجس (يدخل الضابط يدفع رشوان في قميص الاكتاف ويوقفه امام المامور وتصمت نرجس) ـ ابوه يا رشوان ازيك دلوقت .. المأور _ حي .. قيوم .. خمس رصاصات يا سهادة رشوان الميه كل رصاصة في واحد . . خمسة في خمسة .. وماحصلش حاحه أنا قلت له أنتوا متحصين .. قال لا احنا ميتين .. حي .. حي لايموت . . الله . . الله . . الله اكبر على من طغي وتكبر . . _ (بهمس للضابط) كالمور خد البوكس واتنين عساكر وودوه المستشفى ٠. الم

الضابط	_ حاضر يا افندم
رشــوان	ــ اروح فين المدافن لا الله الغني انا
	عاوز أروح الجنة دانا غلبان وعندى عيال
	عاوز اربيهم
المامور	ـ خده يا حضرة الضابط مطرح ماهو عاوز
الضابط	_ حاضر يا أفندم
رشسوان	_ أروح الجنة الله حي الله حي
	(يدخل رجل مهيب الحكمدار يراه المأمور فيقف
	ويلاقيه في منتصف الحجرة محييا)
المامور	ـ وبعدين يا نرجس
نرجس	_ بس يا سعادة البيه هو راح هاجم عليه من
	هنا ورحت أنا
المامور	ــ اتفضل يا سعادة البيه
	(الحكمدار يدخل ويجلس مكان المأمور على المكتب)
	(المأمور يقف)
الحكمدار	_ ایه آخر التطورات
المامور	_ منتظرين تقرير الطبيب الشرعي
الحكهدار	۔ کئیف علیهم کلهم
المامور	_ أيوه يا أفندم
الحكمدار	_ والعسكرى رشوان ؟
المامور	_ مسكين بعته دلوقت حالا المستشفى الصدمة
	كانت شديدة عليه
الحكمدار	ــ سألت كل الشمهود
المامور	(یشیر الی رضوان)
	سألت خفير المقابر وكت باسأل البت دى
الحكمدار	دی ایه کمان

_ دى اللى شافتهم الأول	المامور
_ طب وحياتك استعجل الطبيب الشرعى	الحكمدار
_ هو قاعد في مكتب نايب المأمور بيكتب الثَّقرير	المأمور
_ والحراسة هناك	الحكمدار
ـ قوات كفاية جدا يا أفندم محاصره القرافة كلها	المأمور
وفيه عربيتين نجدة اذا حصل أي حاجه	
حيبلغونا باللاسلكي	
_ طب وحياتك استعجل تقرير الطبيب الشرعي	الحكمدار
_ حاضر يا أفندم	المأمور
(المأمور يخرج والحكمدار يرفع سماعة التليفون ويدير	
رقما ويتحدث)	
_ مساء الخير يا أفندم التقرير حيوصل	الحكمدار
حالا حابلغه لسيادتك على طول تصبح على	
خيريا افندم	
(الحكمدار يضع السماعة ثم ينظس الى نرجس التي	
وقفت بعيدا ويناديها)	
۔ تعالی یا شاطرہ هنا	الحكمدار
(تنقدم نرجس وتقف امام المكتب)	
_ اسمك ايه	الحكمدار
ـ اسمى نرجس	نرجس
 بتشتغلی ایه 	الحكمدار
_ ما بشتغلش	نرجس
_ وشفتی ایه بقی	الحكمدار
_ أنا كنت ماشيه يا سعادة البيه وبصيت لقيته	نرجس
راح هاجم علیه	
_	

_ سيادتك تشرب شاى والا قهوة ... المأمور _ لا متشكر ولا حاجه .. الحكمدار ـ عندنا بن كويس . . المامور _ يبقى فنجان ع الريحة .. بس وحياتك الحكمدار التقرير .. _ فاضل آخر صفحة .. المأمور (يغرج المأمور والجرسون) الحكمدار _ وبعدين يا نرجس .. _ بس يا سعادة البيه هو راح هاجم عليه من نرجس هنا . . (يدخل المأمور ومعه الطبيب الشرعي .. يقف الحكمدار . ويصافحه الطبيب الشرعي ثم يجلس المأمور وينظر الي نرجس ورضوان والمسحراتي . .) المأمور _ استنوا بره شویه . . ما تمشوش . . (تخرج نرجس ورضوان . . يجلس المأمور) الحكمدار _ خیر یا صبری بیه _ والله با سعادة الحكمدار حكاية محيره جدا . . الطبيب أنا مش عارف أقول أنه بالظبط . . _ سيادتك كشفت عليهم .. الحكمدار _ كشف كامل جدا .. الطبيب _ والنتيحة .. الحكمدار _ (يقرأ من الورقة) الطبيب أول واحد اسمه عبد الغفار محمود السيد. سن واحد وعشرين من غرين مركز منوف مصاب برصاصة في أسفل القلب ومتوفى من

۱۵ شهرا . .

الثانى محروس سليمان عبد السيد سن ٢٢ من زاوية غزال بحيرة مصاب بشطية مستقرة بقاع الجمجمة ومتوفى من تمنتاشر شهر ..

الثالث خميس عبد السلام رشاد سن ۲۱ من كوم الشقافة باسكندرية مصاب برصاصتين في البطن نشأ عنهما تهتك داخلي ومتوفي من سنة ونص ...

والرابع شوقى ابراهيم مصطفى من سنهور محافظة الفيوم مصاب برصاصة فى العمود الفقرى وميت من تمنتاشر شهر ..

والخامس رمضان محفوظ رمضان من طره الاسمنت محافظة القاهرة مصاب بتمزق في الاحتباء ومتوفى من ١٨ شهر ...

الحكهدار ــ يعنى ميتين صحيح . .

الطبيب ــ فعلا ومن تمنتاشر شهر يعنى كلهم ماتوا في
ونيو ١٩٦٧

الحكمدار _ يبقى الكلام مظبوط ...

الحكمدار ـ دا كمان ثبت انه صحيح لأنه بالكشف في ادارة السنجلات العسكرية اتضح انهم الخمسة من المفقودين في سيناء في يونيو ١٩٦٧ والوزارة اعتبرتهم شهداء من الأول خالص ..

الطبيب ـ بس علينا نقول ايه . ، ما حدش قال كده برضه . .

الحكمدار	_ دا بیثبت یا دکتور آن فوق کل ذی علم علیم
	فيه لسه في الكون اسراركتير العقل ماوصلهاش.
الطبيب	_ حاقول لك ايه لو كنت سبق أنا اللي كشفت
• •	عليهم كنت رديت عليك وقلت كلام كتير انما
	حاقول ايه
الحكمدار	ـ وحياتك يا حضرة المأمور صورة من التقرير لكل
	الجهات
المأمور	ـ حاضريا أفندم
	(يقف الطبيب الشرعي)
الطبيب	_ استأذن أنا بقى
الحكمدار	_ مع ألف سلامة تعيناك
	(الطبيب يصافح الحكمدار والمأمور والاخير يوصله الى
	ياب الكتب)
المامور	_ مش عارف کان مستخبی لنا فین ده
الحكمدار	ـ باقول نخطر النبابة بقى
المأمور	_ لازم فعلا نخطر النيابة بس أى نيابة
الحكمدار	_ على رأيك النيابة العامة دول مش مجرمين
	النيابة العسكرية دول مش عسكريين
	نيابة أمن الدولة هي مالها
المأمور	_ مفيش غير نيابة الاسكان
الحكمدار	_ الاسكان ؟
المامور	ــ مش بیدوروا علی مقابر فاضیة
الحكمدار	_ باقول اخطر النايب العمومي وهو يتصرف
المامور	_ معقول برضه
	(المأمور يصل الى الباب ويوقفه صوت الحكمدار)
الحكمدار	_ هات الساهدة لما نكمل استحوابها

۔ حاضر	المامور
(يخرج المأمور الحكمدار يرفع السمسماعة ويدير	
القرص ويتحدث)	
_ مساء الخير يا أفندم آسف يا أفندم	الحكمدار
التقرير في الطريق لا يا افندم ميتين فعلا	
يا أفندم من سنة ونص ٠٠	
(أثناء الحديث تدخل نرجس وتقف أمام الحكمدار)	
حا اخطر سيادتك بكل التطورات يا أفندم	
مع السلامة يا افندم	
(يضع الحكمدار السماعة وينظر الى نرجس)	
_ وبعدین یا انتی اسمك ایه	الحكمدار
_ نرجس يا سعادة البيه	نرجس
۔ وبعدین یا نرجس حصل ایه	الحكمدار
ـ بس يا سعادة البيه هو راح هاجم عليه	نرجس
(يدخل المأمور مسرعا)	
_ الصحفيين بره عاوزين يقابلوا سيادتك	المأمور
(يهب الحكمدار واقفا كمن لدغته عقربة)	
_ صحفيين عاوزين ايه دول كمان	الحكمدار
_ طبعا سمعوا عن الحكاية وعاوزين تفصيلات	المأمور
_ وعرفوا منين دول	الحكمدار
_ هو فیه حاجه بتستخبی علیهم	المامور
_ ع العموم قول لهم اي حاجه وخليهم يروحوا	الحكمدار
مش فاضيين لهم	
_ باقول برضه يقابلوا سيادتك وتقول لهم اي	المامور
كلمتين	•

الحكمدار ــ هاتهم يا سيدى ٠٠٠

(ينظر الى ترجس)

استنی بره شویه ..

(يخرج المامور وتخرج نرجس .. يعود المامور ومعه عدد من الصحفيين والمصورين .. يقف الحكمدار وأثناء الحديث يقوم المصورون بالتصوير بالفلاشات)

- صحفى (١) _ عاوزين تفصيلات الحادث ..
- صحفى (٢) _ هم ظهرو! الساعة كام بالظبط ..
 - صحفی (٣) ـ ایه التصرف معاهم داوقت ...
 - صحفی (٤) _ هم صحیح کانوا فی سیناء . .
- صحفى (١) ـ رأى سيادتك في الحكاية دى ايه ..
 - صحفى (٢) ـ العلم يرفض ٠٠٠
- الحكمدار ـ أنا كان يسمدنى انى أجيب على أسئلتكم كلها الا أنه حرصا على مصلحة التحقيق تقرر حظر نشر أى شيء عن الواقعة ..
 - صحفی (۱) ازای ۰۰
 - صعفی (۲) _ مش معقول . .
 - صحفی (۳) _ نقول للناس ایه . .
 - صحفى (١) _ انما الشعب لازم يعرف ...
- المامور _ انفضلوا حضراتكم بقى عشان انتوا بتعطلوا التحقيق دلوقت

(يخرج الصحفيون)

هات البت الشاهدة بقى ..

(يخرج المامور ويدخل ومعه نرجس)

الحكمدار ــ (يجلس)

ـ وبعدين يا نرجس ..

نرجس ـ وبعدين يا سعادة البيه هو أول ما هجم عليه . .

_ س_نار _

اللوحة الثالثة

المنظسر:

(دار صحيفة الانباء . . مكتب مدير التحرير . . مدير التحرير التحرير التحرين التحرين المعودين التحرين كاميراتهم)

مدیر التحریر ماهو مش معقول .. مش معقول .. حدث خطیر زی ده ویطلع الجرنان بکره مفیهوش کلمة واحدة عنه وانت یا سی سامی تقولی حظر نشر ..

سامى __ يا أفندم الحكمدار بنفسه قال الكلام ده . .

مدير التحرير – اقطع دراعى اذا ما كانت ابو الهول طالعه بكره بمنشيت أحمر وصور واحاديث خاصة مع العساكر الميتين .. الميتين اللى صحيوا والميتين اللى ما صحيوش كمان ..

سامى _ طب واحنا نعمل ايه . .

مدير التحرير _ نشتغل .. نتحرك .. نبذل مجهود ..

سامی ــ یا افندم فیه حظر نشر . .

المامور ــ النائب العام ما أصدرش حاجه لحد دلوقت ... فيه قرآر بمنع النشر من النائب العام ..

مدير التحرير _ بمكن بيتخلص منكم . . بمكن مش فاضى لكم . . سنامى _ يا افندم لا يمكن تكون المسائل بالبساطه دى . .

معير التحرير ـ لا بالبساطة دى واكتر شويه كمان . . حضرتك حاولت تروح المدافن تقابلهم ولا تاخد لهم صورة واحدة ؟

ساهى __ ما قلت لك المنطقة كلها محاصرة ولا يمكن حـــد يعرف يوصل هناك

مدير التحرير _ اعمل أي طريقة أتصرف الصحافة عاوزه تصرف يعنى نطلع بكره ولا كلمة . .

ساهى ــ احاول مرة تانية . .

مدير التحرير _ (لمحرر آخر)

وانت يا استاذ فؤاد حاولت تتصل بأسر الجماعة دول ..

فؤاد ــ اسرهم ؟؟

مدير التحرير ـ ايوه يا استاذ اسرهم .. عائلاتهم .. العساكر دول مش من عائلات لهم اب وام واخوات وزوجة واولاد .. لازم تسألهم شعور الأم اللى نقدت وحيدها لما صحى تأنى ... ازاى الخبر جالها .. ازاى عرفت ابنها رجع للحياة .. قصص يا استاذ عاوزين قصص انسانية .. الأم الثكلى تسترد وحيدها من الحياة الأخرى .. الزوجة اللى مات زوجها ليلة الزفاف .. ما هو شعورها عندما عاد اليها ..

فؤاد _ يا افندم نجيب الناس دول منين واذا كنا احنا مش عارفين مين هم العساكر دول اسماؤهم ايه وبلادهم فين ..

معير التحرير _ دوريا استاذ . . ابحث اتصل بجميع المندوبين

فى الأقاليم كلفهم يسألوا .. حاول تعرف تقرير الطبيب الشرعى ..

فؤاد ــ حاضر . .

مدير التحرير _ اتفضلوا واقفين ليه اتصرفوا ..

(يخرج سامي وفؤاد ومع كل منهما مصور)

مدير التحرير _ (لمحرر آخر)

وانت مش تروح تشوف لك خبرين عشدان الباب بتاعك ، اخبار صغيرة ، الناس بتحب الحاجات دى ، ايه أول كلمة قالها العسكرى أول ما صحى ، مراته قالت ايه ، كانت لابسه ايه ، ايه هى الأكلة المفضلة عنده . . حاول يا استاذ حاول ، اتعلموا صحافة بقى . .

(المعرر لا يرد بل يخرج مسرعا)

(مدير التحرير وحده الآن يرفع السماعة ويتحدث)

مدير التحرير ــ ايوه يا عبد الففار .. ادينى عــلى القرش .. ايوه يا على .. مش حاتحاولوا تستفيدوا من الحـادث ده .. ازاى .. طيب أنا مستنيك ورينى مشاريعك ..

(يضع السماعة ويحدث نفسه)

مدير التحرير ـ اقطع دراعى اذا ما كانت أبو الهول حتطلع بالموضوع كله طب واتصرف ازاى . . حظر نشر أيه بس . .

(يدخل على القرش ومعه مساعده فكرى يحييان باليد ويجلسان)

على ــ مساء الخير . .

مدير التحرير ــ اهلا يا استاذ قرش . . اياك تكون فكرت في حاجه نستفيد بيها عن الحادثة دى . .

على ــ الحقيقة أنا من أول ماسمعت قعدت أنا والأستاذ فكرى وطلعنا بكام مشروع مش بطالين ...

مدير التحرير ــ اتفضل اياك يكون فيهم حاجه تنفيع . . اهى تجيب قرشين للجريدة عشان العلاوات . .

على ــ معلوم . . معلوم اتفضل يا استاذ فكرى . .

فكرى ــ احنا فكرنا فى اننا ناخد العساكر اللى صحبوا دول ونعمل لهم عرض أزباء . .

مدير التحرير _ عرض ايه ؟

فكرى ــ ازياء . . دى غلبة يعنى . .

مدير التحرير _ ازاى . .

على ـــ اقول لحضرتك . . يعنى ناجر صالة هيلتون او سميراميس وناخد الجماعة دول ونلبسهم بدل مضانعنا

مدير التحرير _ ناخد المساكر اللي كانوا ميتين وصحيوا ونعمل لهم عرض أزياء

على ــ أى شركة أزياء أو شركة أقمشــة تدفع آلاف الجنيهات في نظير أعلان زى ده .

مدير التحرير ــ بس يعنى .. انا حاسس ان المشروع ده شويه كده ..

على ــ فيه مشروع تانى انما واثق انك حتوافق عليه على على طول . .

مدير التحرير _ اتفضل . .

فكرى ـــ المشروع يتلخص في . .

على _ (مقاطعا)

استنی یا استاذ فکری اشرحه آنا . .

فكرى ـ اتفضل . .

على __ زيارة العساكر دول للمعرض الصناعي ..

مدير التحرير _ زبارة ..

على ـــ أيوه ناخــدهم بزوروا المعرض جناح جنــاح ونصورهم في كل جناح وطبعا أى رئيس مجلس ادارة يرحب أنه يتصور معاهم . . ننشر الصور في الجريدة ونعمل فيلم كمان عشان التليفزيون.

مدير التحرير _ دى معقولة اكتر ..

على ــ تصور سيادتك العنوان ده . . الموتى الأحياء فى زيارة جناح شركة اس اس . . المهندس على على على على على رئيس مجلس الادارة يستقبل الموتى الأحياء فى جناح شركة اف اف . الموتى الأحياء ينصحونك باستخدام معجون اسنان ار ار . . .

مدير التحرير _ معقول الى حد ما . .

مدير التحرير _ بس يسسيبوهم دا أنا سسمعت أنهم عاوزين يندفنوا تأنى . .

على __ قبل ما يندفنوا .. الحكاية مش حتستفرق اكتر من ساعة واحدة .. يقدروا يأخروا الدفن شويه ..

مدير التحرير _ يأخروا الدفن عثمان اعلاناتك . . عثمان الدعاية للتطور على . عثمان الدعاية للتطور

الصناعی دی خدمة وطنیة . وأنا وأثق أنهم لایمکن یعترضوا علی حاجه زی دی

مدير التحرير _ ايه ده ..

سامى ــ دا القرار . .

مدير التحرير _ (بقرا بصوت مرتفع)

يحظر نشر أى شيء عما حدث اليوم في مقابر الامام لمصلحة التحقيق ..

(يرفع راسه)

بس دا اللي حنقوله للناس المسبع . . والله عال . .

على ــ يبقى طارت الاعلانات والعلاوات . .

مدير التحرير ــ ازاى . . لازم نستعد . . حظر النشر دا مش حيستمر على طول انت با سامى تقول لاخوانك كلهم يستمروا في عمل الموضوعات اللى كلفتهم بها . . وانت با استاذ على تعمل مجهود عشان تاخدهم المعرض . . اول ما حظر النشر بتر فع نبقى جاهزين . . امال ايه اتحركوا . .

(یخرج سامی وعلی وفکری مسرعین)

_ ســـتار _

اللوحة الرابعة

النظر:

(مقابر الامام الوقت قبيل الفجر . . الجو ما ذال باردا وضعت بجوار احد القبور مائدة صفية وجلس امامها المحقق وبجواره الكاتب بكتب وامام المائدة الجنود الخمسة يقفون اربعة في صف واحد والذي يساله المحقق يتقسدم خطوة الى الامام وخلف الجنود احد ضباط الشرطة ومعه اثنان من العساكر المسلحين ومن بعيد يرى جنود الحراسة وعدد من الاهالي يمنعهم الجنود من الاقتراب . . المحقق يسال الجندي الاول عبد الغفاد . .)

المحقق _ اسمك وسنك وصنعتك ..

عبد الففار _ عبد الغفار محمود السيد سن واحد وعشرين من غرين مركز منوف

المحقق ـ وقبل ما تدخل الجيش كنت بتشتغل آيه ؟

عبد الففار _ نلاح . .

المحقق ـ احكى لنا حكايتك بالظبط ...

عبد الففار ــ مفيش حكاية ولا حاجه أنا والجماعة دول ..

(يشير الى زملائه)

وقلنا نندفن هنا احسن ... الشاويش اعترض سكتنا ، آدى الدور ..

المطلق _ مت ازاي . .

انا كت في الفرقة الثالثة مشاة وقبل الحرب كنا في سينا وكنا معسكرين حوالين الحسينة وبعدين يوم ه يونيو سنة ١٩٦٧ العدو هجم علينا صديناه وحاربنا جامد قوى وبعدين يوم الصبح صدر لنا أمر بالانستحاب دورنا عالقائد قالوا نزل مصر انسحبنا في ممر متلا اتقابلنا احنا والفرقة السادسة اللي كانت منسحبة زينا كنا كتير في المر طيارات العدو اصطادتنا وجاتني اصابة في قلبي ومت وكان معايا شوقي ..

(ويشيم الى احد زملائه)

ورمضان هم كانوا في الفرقة السادسية الصابنا كلنا في ممر مثلا

المحقق ــ يوم خمسة ... ايه اللي حصل بالمطبوط .. عبد الففار ــ العدو هجم علينا من بعيد وكنا نقدر نهجم عليه

جامد ، ،

المحقق ـــ كان معاكم قوات كفاية . .

عبد الففار ــ كان معانا كتيبتين و ٧٥ دبابة ولو هجمنا كنــا عملنا حاجه كبيرة القائد رفض

المحقق ـ رفض ليه . .

عبد الففار ــ ما اعرفش واحنا سممنا انه طلب الاذن يالانسحاب

المحقق ــ ليـه . .

عبد الففار ــ ما اعرفش وبعدين رفضوا يخلوه يسحب وهجم علينا العدو واشتبكنا معاه جامد . .

المحقق ــ لحد يوم كام . .

عبد الففار ــ لحد الساعة تمانية وربع يوم ٧ لما صدر الأمر بالانسحاب . .

عبد الففار

ـ وانسحيتوا الحققي _ كان لازم ننسحب للجنوب انسحبنا للغرب .. عبد الففار _ ليه .. المحقق _ عشبان القائد كان سايبنا ورجع مصر .. عيد الففار _ eco les kup .. المحقق _ ان احنا بقينا زحمة احنا والفرقة السادسية عبد الففار عند ممر متلا _ يوم خمسة كان فوقكم طيارات .. المحقق _ لا .. وعشان كده كنا نقدر نهجم جامد عبد الففار - وبعد الحرب ايه اللي حصل .. المحقق - ولا حاجه متنا والدفنا في سينا وبعدين الحكانة عبد الففار طولت صحيت أنا وزملائي وقلنا نيجي نندنن في ارضنا احسن .. _ طب ما هي سينا ارضنا برضه .. المعقق _ أيوه بس الحكاية طولت واحنا قلقنا ... عبد المفار _ طب اتفضل انت .. المحقق (بشير الى الثاني) تعالى انت .. (يتراجع عبد الفغار ويتقدم خميس) _ اسمك وسنك وبلدك المحقق - خميس عبد السلام رشاد سن واحد وعشرين خميس من كوم الشيقافة في اسكندرية .. _ قبل ما تدخل الجيش كنت بتشتفل فين . . المعقق ـ في البحر. . . خهيس _ ايه اللي حصل .. المحقتي

_ يوم خمسة يونيه أنا كنت من قوة مطار المريش خهيس طيارات العدو هاجمتنا والقائد بتاعنا أصدر امر بالانسحاب انسحينا _ وبعدين . . المحقق ـ وبعدين أنا شغت طيارة من بتوعنا وأقفة في خميس المطار قلت في عقل بالى مش معقول نسبيها كده زي ماهيه سليمة وبعدين رجعت عشان انسفها. _ تنسفها .. باله .. المحقق _ بأى حاجه دا عود كبريت كان يخليها كوم تراب. خهيس _ وتنسفها ليه .. المحقق _ أولا عشان العدو ماستعملهاش .. وثانيا لو خهيس اتنسفت كانت حتخلى المطار غير صالح للاستعمال بسرعة . . وثالثاعشان ماباخدوهاش ويفرفوا أسرار اسلحتنا ... _ ونسفتها ... المحقق _ ما لحقتش نزلت على طيارة من طيارات المدو خهيس ضربتنی بالرشاش انصبت فی رجلی قعدت ازحف لحد مامت واندفنت هناك في الصحراء... المحقق ـ وبعيدين . . - وبعدين صحيت مع الجماعة واتفقنا ان احنا خميس نيجي نندفن هنا _ طب اتفضل ... المحقق (يشبر الى محروس) تعالى انت ..

(يعود خميس ويتقدم محروس)

ـ اسمك وسنك وبلدك	المحقق
_ محروس سليمان عبد السيد ٢٢ سنة من زاوية	محروس
غزال بحيرة ٠٠	
_ كنت بتشتغل ايه قبل ما تروح الجيش	المحقق
فلاح ِ	محروس
۔ ایه اللی حصل	المحقق
_ انا كنت في رفح يوم خمسة العدو هجم علينا	محروس
انما احنا انقسمنا قسمين وقدرنا نطوق قوات	
العدو وحاصرناه وتقدمنا ناحية أرض فلسطين	
وبعدين حصل اللي حصل	
ــ ايه هو اللي حصل	المحقق
_ بعد ما دخلنا كام كيلو صدر لنا امر بالانسحاب،	محروس
_ لیـه ۰۰	المحقق
۔ ماعرفش	محروس
_ كنتوا تقدروا تتقدموا	المحقق
_ طبعا وكان معانا قوات كفاية وسلاح كفاية	محروس
_ انسىحبتوا	المحقق
ـ أيوه وفي اثناء الانسلحاب صابتني شظية قنبلة	محروس
جت فی راسی ومت	
_ وبعدين	المحقق
_ ولا حاجه لما قلقنا قلنا نقوم ونيجي نندفن هنا	محروس
_ طب اتفضل انت	المحقق
(ویشیر الی شوقی)	
تمالی انت	
(يعود محروس ويتقدم شوقي)	
_ اسمك وسنك وبلدك	المحقق

شوقي ۔ شوقی ابراهیم مصطفی سن ۲۱ من سنهور ۔ فيوم . . - كنت بتشتفل ايه قبل ما تدخل الجيش .. المحقق _ أنا كت طالب .. شسوقي ـ أيه اللي حصل .. المحقق شسوقي _ ولا حاجه .. _ ولا حاجه ازای ماحاربتش .. المحقق شيوقي ـ ابدا ولا شفت حرب خالص من اصله .. المحقق .. مادخلتش معركة مع الأعداء . . ـ ولا شغت اعداء ولا أبها حاجة . . شبوقي _ امال رحت سينا ازاى ومت ازاى .. المعقق سرحت مم الكتيبة وقعدنا هناك في المسكر وأول شوقي ما هجم العدو استعدينا عشبان نتقدم صدر لنا أمر بالانستحاب المحقق ۔ ویمیدن .. _ وصلنا ممر متلا وهناك اصطادتنا طيارات العدو شبوقي وانصبت في العمود الفقرى ومت . . _ وقمت مع الجماعة وجيتم عشان تندفنوا هنا. . المحقق ــ أبوه . . شـوقي _ طب اتفضل .. المحقق (بشبے الی رمضان) تعالى أنت . . (يتقدم رمضان ويمود شوقي) المحقق ـ اسمك وسنك وبلدك . . ـ رمضان محفوظ رمضسان سسن ۳۰ من طره رمضان الاسمنت قسم حلوان

_ قبل ما تدخل الجيش كنت بتشتفل ايه . . المحقق ـ كنت عامل بشركة المواسير .. رمضان _ ایه اللی حصل . . المحقق _ أنا خدمت في الجيش قبل كده وفي مايو ١٩٦٧ رمضسان خدوني رديف ورحت سينا .. المعقق - وبعساين .. - لما دخلت الجيش تاني لقيت السلاح غير السلاح رمضيان وأنا ما اعرفش حاجه في السلاح الجديد .. المحقق ما ادربتش ع السلاح الجديد ؟ _ لا كل ما أقول لهم عاوز أتعلم السلاح رمضيان الجديد يقولوا لي بكره .. المحقق ـ وبعسدين . . _ جت الحرب وانسحينا وانضربت .. رمضيان ـ انسحبتوا ليه .. المحقق _ عشان كان فيه امر بالانستحاب .. رمضان ۔ ومت ازای .. المحقق ـ العدو عمل لنا كمين واحنا راجمين وعند ممر رمضان متلا انضربنا ـ ما حاولتش تدافع عن نفسك .. المحقق ـ كان معايا مدفع انما ماكنتش عارف بيشتفل رمفسان ازای .. المققي ـ وبمدين . . ولا حاجه جالى رصاصة فى بطنى ومت ... رمضان المحقق - وجيت عشان تندفن هنا .. رمضان _ أبوه . .

ـ طب اتفضل انت . . المحقق _ (يملى الكاتب) ريعصا وقفل المحضر على ذلك في تاريخه وساعته (يقف المحقق والكاتب يفلق الاوراق ويقف حاملا دوسيه المحقق يقترب من الضابط) _ أنا مش شايف فيه أي مانع من أنهم يندفنوا .. المحقق ـ حاضر يا أفندم . . الفيابط ـ أنا حاعرض التحقيق انما سيبوهم يندفنوا المحقق مطرح ماهم عاوزين _ حاضر يا أفندم . . الضابط (يخرج المعقق وخلفه الضابط) (الضابط يتقدم من الجنود) _ اتفضلوا حضراتكم كل واحد يشوف هو عاوز الضابط يندفن فين .. (الجنود يتهامسون واخيرا يتقدمون وقبل أن يسميروا خطوات يخرج لهم من احد القبور ميت يرتدى الكفنالابيض (« مبد المال ») ـ حيلك انت انت وهو رايحين فين عبد المال ـ رابحين نندنن .. عبد الففار عبد العال ـ هي فوضي . . (الضابط يسرع متدخلا) - فيه انه .. انت مين الضابط ـ أنا المدفون هنا .. عبد العال الضابط _ وعاوز ایه .. _ مش ممكن الجماعة دول يندفنوا هنا .. عبد المال

· الضابط ـــ ازاى بقى وانت دخلك ايه فى الموضوع . .

عبد المال ــ انا مت في حرب ٨٤

الضابط ـ وده دخله ایه فی الموضوع . .

عبد العال __ يعنى المدفونين هنا الناس اللي حاربوا ..

الضابط _ دول كمان حاربوا ..

عبد العال ـ مش كلهم ..

الضابط __ بعنى عاوز ابه دلوقت

عبد المال ــ لا يمكن دول يندفنوا معانا . .

(اثناء الحديث بخرج عدد من اليتين لابسسين الاكفئة البيضساء وينضمون للميت اللى يتحدث . . الضابط بضطرب ويشير الى الجنود أن ينتظروا)

_ ســـنار _

اللوحة الخامسة

	المنظسر:
(مقهى في وسط القاهرة مجموعة من الكتاب والادباء حول احدى الواتد بالقهى فريد ومصام ومحمود وصبحي)	
ـ انا وائق یا جماعة مش اشاعة دی حقیقة و ما اقدرش اقول لکم أنا عرفت منین انما دی حقیقة	فريد
ـ دى حاجة اشـبه بالخبـال ٠٠ زى الروايات بالظبط ٠٠ قصة درامية خيالية ٠٠	عصام
۔ آنا مش مؤمن بالغیبیات بناعتکم دی یا جماعة فوقوا بقی ازای ناس مثقفین زیکم یصدقوا قصة خرافیة زی دی	محملود
_ بيقول لك حصل	عصسام
ـ حتى لو كان حصل أنا لا يمكن أناقش مسائل خرافية كفاية بقى وبتقولوا الدولة العصرية وتكنولوجيا كمان	محمود
۔۔ اذا كان حصل تقول ايه	فريد
ـ حصل فی روایة کاتبها کاتب امریکانی اسـمه اروین شو	محمود
_ قريناها وشوفناها كمان ع المسرح اسمها ثورة المرة الم	فريد

- وكان أروين شو خد الفكرة من كاتب نمساوي صبحي اسمه هانزشلوبيرج اسمها معجزة في فردوم ... انما دا حصل في الواقع واذا ماكنتش مصدق قوم روح لحد المدافن شوف بنفسك .. _ فيه هناك حصار .. محمدود _ وفيه قرار بحظر نشر أنا قريته بنفسي في فريد الجريدة .. ـ وقال ايه القرار .. محمود _ قال ان ممنوع نشر أى شيء حدث في مدافن فريد الامام .. _ قال ایه اللی حدث .. یمکن عصابة مخدرات محمود او خنافة كبيرة شوبه او قضية جاسوسية أو ای حاحه .. ـ انا باقول لكم أنا واثق . . فريد _ انت حر انما أنا واثق أن دا ماحصلش وأذا حتى محملود كان حصل يبقى تخريف ناس عاوزين يودونا في داهية . . كفاية يلهو الناس بحاجة زي دي ... ـ مفيش كاتب ياخد الموضوع ده ويحطه في قصة عصام او مسرحية . . _ قصة أو مسرحية فكرك الرقابة توافق على حاجه محمود زی دی ۱ ـ ليه لا .. عصام _ احنا قاعدين نقول الرقابة الرقابة حــ كتب فريد

حاجه والرقابة قالت لا ...

ـ انت بتسالني طب قوم اكتب الحكاية دى كده محمحود ونشوف .. - اكتبها ازاى اذا كت مش مقتنع بيها . . محمود _ خليك مش مقتنع بحاجة أبدا .. فريد _ مش كفاية حكاية الزيتون ضحكت علينا محمود العالم .. ـ اهى البلدية خدت لها قرشين . . صبحى _ وحكاية الزيتون فيه ناس مثقفين زى حضرتك عصام أكدوا أنهم شافوها بنفسهم مغیش فایده فیکم آبدا .. محمود _ والله انت اللي مفيش فايده فيك .. فريد (يدخل الاستاذ عبد الجليل ويحييهم ويجلس) _ سلامو عليكم .. عبد الجليل _ عليكم السلام ورحمة الله وبركاته .. الجميع عبد الجليل _ سمعتوا الحكاية place ـ سممنا . . _ طب اسمعوا دى وقولولى رايكم بصراحة .. عبد الجليل _ اوعى تكون قصيدة .. محمدود -- (بفضب) --عبد الحليل حتكون ايه يعني . وصفة بلدي . . _ انا قایم .. محمسود _ في ستين داهيه دا حتى امثالك لا يجب انهم عبد الجليل سمعوا الحاجات دى . . _ طب ماتلخبطش قول . . معموود _ (يطبق الورقة) عبه الحليل

أقول أيه ما سديت نفسي مسام ـ طب قول ما تزعلش .. ـ اطلبولي واحد شاي . . عبد الحليل _ محمود يطلب لك هو اللي عكر دمك ... فريد ــ ولا تزعل قول بقى .. محمود (يصفق) (يحضر الجرسون) _ واحد شاى للاستاذ عبد الجليل على حسابي . . محمود (ينخل العرسون) ۔۔ کشری ... عبد الجليل ـ قول بقى سممنا .. فريد ليميد فتح الورقة ويقرأ) عبد الحليل رفضيوا المات لأنهم أحيساء والارض أرض والسيهاء سماء هجروا المقساير والحيساة عزيزة لا سيسيما اذ أنهم أشسيداء قاموا من الأرض الخراب وحلقوا فسوق الرؤس كأنهم عنقسله بدلوا الحباة رخيصة فوق الثرى وتبعثرت أجسسادهم اشسسلاء فاليسوم أن هبوا وقاموا قومة فالقصيعة انذار لنها ونداء ـ دا بقى اللي جادت به القريحة محملود _ قصدك ايه . . والا مش عاجبك الشمر الطليدي عبد الجليل

عصام - هايل يا أستاذ عبد الجليل .. عبد الخليل - قول للاستاذ .. فريد ـ انما تقديركم للموقف ايه . . _ أنا متصور أن المسألة أعمق من كده بكتير .. مسحى _ عنها . . أنا عاوز تفسير علمي . . محمود - والله مش شغلنا ومن ناحية العلم برضه مش فسريد كل حاجه قدر يحلها العلم .. عصام - وعلى أيه . . يا أخى فيه التلبائي وفيه حاجات كتير برضه العلم قدر يوصل لها .. - تلبائی یعنی واحد یسمع صوت واحد تانی محمود بعید عنه .. مش کده . . دا تصور ممکن بحصل . . ـ يعنى قصدك الناس ماشافوهمش تصوروهم . عصام _ أنا رافض الموضوع أصلا .. وبكره تطلع المسألة محمسود اشاعة مغرضة .. ـ والغرض منها أيه . . صبحى ـ موضوع الناس تتكلم فيه شوية وخلاص .. محملود مش واضحة الحكاية دى ٠٠ _ ع المموم احنا نقدر نروح هناك نشوف بنفسنا. فسريد

_ ســـتار ب

اللوحة السادسة

المنظس :

(مقابر الامام . . مأمور القسم وبعض الضباط من حوله يقفون بين مجموعتين من الاموات . . الى اليمين الجنسود الخمسة والى اليسار خمسة من الميتين يرتدون الاكفان البيضاء)

المامور ـ يا جماعة احنا كلنا اخوات ولازم نساع بعض الترب واسعة والحمد لله ليه حنخلق احنا

المشاكل بس ..

عبد العال ــ المسألة مش مسألة أماكن مسألة مبدأ ونظام .. وحضرتك أظن أول من يطبق النظام ..

المامور ـ طبعا وعشان كده بقول لازم المشكلة دى تنتهى فورا . .

عبد العال _ تنتهی ازای ؟

المامور _ انكم تسمحوا للاخوان ..

(ويشيع الى الجنود)

انهم يندفنوا معاكم ..

عبد المال ــ دى لا يمكن أبدا . . المنطقة دى مخصصة للى ماتوا في الحرب أنا وزملائي دول . .

(بشير الى زملاته)

حاربنا فى فلسطين سنة ١٩٤٨ وأصبنا هناك ومتنا هنا في المستشفى واندفنا هنا يعنى بساطة الترب دى مخصصة للمحاربين ودول ما حاربوش فيندفنوا معانا ازاى ..

المامور	_ اولا دول اخوانكم في الجيش وماتوا في سيبيل
	فلسطين وانتوا كمان متوا في سبيل فلسطين
	يبقى العقل كده يقول انهم يندفنوا معاكم
عبد المال	_ اذا كانوا ماحاربوش يندفنوا معانا ازاى
عبد الففار	_ احنا كنا مستعدين نحارب وهما قالوا انسحبوا
عبد المال	_ المهم النتيجة النتيجة انكم انسحبتم من غير
•	ما تحاربوا يبقى تعتبروا نفسكم حاربتم ليه
عبد الففار	_ اذا كانت المبرة بالنتيجة فانتم ابه كانت نتيجة
•	 حربکم
عبد المال	_ احنا كنا على ابواب تل أبيب
عبد الففار	_ ومادخلتوهاش ليه ؟
عبد العال	_ جت لنا أوامر الهدنة وماتنساش كمان السلاح
•	الفاسيد
عبد الففار	ــ أهى أوامر الهدنة زى أوامر الانسحاب والسلاح
•	الفاسد زى القيادة العسكرية الفاسدة دى
	زى د ى
المامور	_ دا کلام منطقی جدا الوضع واحد وعثمان کده
	لازم تكونوا مع بعض يالله يا اخوان اتفضلوا
عبد المال	_ يتفضلوا ايه لا يمكن دى زى دى
المامور	ــ شوف اسمع أنا باتكلم لحد دلوقت بالعقل
	انما أنا عندى أوامر أنهى الموضوع ده ولو
	باستخدام القوة
عبد المال	_ القوة مع مين مع ناس ماتوا من عشرين سنة
المامور	_ (لنفسه)
	على رايك حتممل ايه القوة في ناس ماتوا
	وشبعوا موت كمان
	(A 11 B) A

طب الحل ايه في نظركم ...

عبد العال ـــ الحل انكوا تشوفوا مكان تانى لاخوانا دول غير الترب بتاعتنا احنا . .

المامور ـ طب خليهم يندفنوا معاكم مؤقتا لغاية مانشوف مكان تاني ..

عبد الففار ـ احنا لو كنا عارفين كده ماكناش جينا من هناك . . انما دلوقت المسألة مسألة كرامة . . احنا لا يمكن نندفن هنا مع دول . .

المامور ـ يا سيد بلاش تعقيد للمسائل احنا حنوصل لحل بس بالهداوة

(يدخل الحكمدار ومعه سكرتير اللجنة .. يقف المأمور ويقابله محييا .. يتقدم الحكمدار)

الحكمدار ــ هيه .. ازاى الحال ..

الحكمدار

المامور ــ ســوء تفاهم بسيط .. أنا كت لســه باقول للاخوان المسألة مش عاوزه كل النزاع ده ..

- (يتقدم ويواجه الفريقين ويتحدث كأنه يخطب) اخوانى .. فى الواقع أنا مضيطر أناشيد وطنيتكم أن تحلوا هذه المشكلة فورا .. انتوا عارفين الظروف اللى بتمر بيها البلد واعتقد أنكم جميعا توافقونى على أن من واجبنا أننا نحقق الهدوء عشان العمل الجدى اللى بيتم ياخد طريقه .. احنا مقدرين تضحيتكم العظيمة مقدرين تضحية اخوانا اللى استشهدوا فى سنة سبعة وستين وأذا كنا أحنا فى الحياة والحباة مطالبها صعبة زى ما أنتوا عارفين قدرنا نساع معض فواجب عليكم فى العالم الآخر أنكم تساعوا

بعض . . أنا باديكم فرصة تثبتوا فيها من جديد أن وطنيتكم واخلاصكم اللى تجلى فى المسارك لسنه موجود بل زادته الأيام قوة وصلابة . .

(بعض المساكر يهمون بالتصفيق فيزغر لهم الحكمدار فيكفون)

عبد العال – احنا مقدرين مشاعركم ولكن اظن سيادة الحكمدار معانا في ان من حقنا على الأقل نختار المكان اللي نندفن فيه انتوا دفتنونا هنا واحنا ما اعترضناش كمان دلوقت عاوزين تحطوا معانا ناس تانيين ...

(السكرتي يهمس في أذن الحكمدار)

الحكمدار ــ يسعدنى أن أقدم لحضراتكم الأستاذ شريف متولى السكرتير عاوز يقول لحضراتكم كلمة . .

(يتقدم شريف ويخرج من جيبه ورقة يقرأ منها)

اللحظات الحاسمة في حياة امتنا ان اقف بينكم اللحظات الحاسمة في حياة امتنا ان اقف بينكم لأعبر عما يجيش في الغؤاد من عواطف مخلصة ومشاعر عميقة وما احمله لكم من تحيات الأهل والاخوان في العالم السغلي عالم الدنيا . . عالم الشرور البكم انتم يا اهل الخلود والبقاء . . ان معركتنا يا إيها السادة تستوجب منا جميما ان نقف يدا واحدة وقلبا واحدا كالبنيان المرصوص أو كالجسم اذا ما اشتكى عضو منه تداعى له سائر الاعضاء بالسهر والحمى . اخواني احرار الأموات . . لقد دفعنى الى موقفى هدا شعورى

شريف

بأن الذي يجرى الآن في هذه البقعة العزيزة من ارض الوطن لابد أن يستفيد منها الأعداء ، أن جبهتنا الداخلية في حاجة الى التماسك والترابط ولا شك أنكم جزء هام من جبهتنا الداخلية . . بل أنتم جبهتنا الداخلية الأولى لأننا لا يمكن أن ننساكم . أننا نقدمكم حتى على انفسنا ونذكر كم ونناشدكم أن تكونوا عند حسن ظن الشعب بكم فتقبلوا طواعية أن تكونوا في القبر اخوانا

انسا يا حضرات الأموات نعساني من أزمة المساكن . . نحن سكان الفانية فلا عجب أن انتم اشتكيتم أيضا من ازمة المقابر ٠٠ بل ان شكواكم هذه دليل انكم تعيشون معنا حتى في مشاكلنا . قضابانا هي قضاباكم . ومشاكلناهي نفس مشاكلكم . . واذا كنا قد استطعنا أن نحل أزمة المساكن في العالم الفاني . وذلك باتاحة الفرصة للقطاع الخاص بالدخول في ميدان البناء حلا للازمة . فانى أعاهدكم أن أتقدم من اليوم باقتراح لكي يساهم القطاع الخاص في حل مشاكل الاسكان في الدار الباقية . وأنا وأثق أن هذا سوف يتيح لكم حلا للازمة الخانقة فيتمتع كل منكم بقبره دون شريك . ولكن حتى بتحقق ذلك ارجو أن تبادروا أنتم وأنا أعاهدكم بصدق أن تحلوا المشكلة حلا مؤقتا حتى يمكن أن تحل المسكلة من جدورها وحسم الداء خير من علاحه ..

(يطبق الورقة ويشيم بيده اشارة واضحة فيدخل الى

المسرح ادبعة من العمال يحمل كل اثنين منهما كرونة ورد كبيرة جدا يتقدم الممال من الخطيب فيساعدهم ويفسع واحدة عند اقدام اموات سنة ٨) والثانية عند اموات ٦٧) _ تقبلوا هذه الزهور المتأخرة تحية منا اليكم في شريف هذا اليوم العظيم .. _ احنا متشكرين على هذه المشاعر ولكنا برضه عبد المال آسفين . . المسألة يا استاذ شريف مسألة ميدا وأظنك ماترضاش بعد ما متنا في سبيل المبدأ نيجي دلوقت ونتراجع . . _ انتوا دلوقت في مواجهة مشكلة اخوانكم .. شريف _ معلش . . اخوانا برضه تشوفوا لهم حتة تانية عبد المال .. كل واحد يروح يندفن في بلده .. _ فكرة .. شريف (يتقدم من الجنود الغمسة) حضرتك منين ؟ _ من منوف . . عيد الففار _ وحضرتك .. شريف _ من البحرة .. محروس . _ وحضرتك . . شريف _ من اسكندرية .. خميس شريف ـ وحضرتك .. شيوقي _ من الفيوم ..

ـ وحضرتك ..

ـ من طره . .

_ (للحكمدار)

أنا أقترح أن أحنا نرحلهم ألى بلادهم ...

شريف

شريف

رمضان

الحكمار ـ نرحلهم ازاى ٠٠

شريف ــ الهجرة للقاهرة زادت جدا والمدينة مكتظة بالسكان وواجبنا اننا نرحلهم على بلادهم لازم كمان يكون فيه قانون أن كل واحد يتولد ويعيش ويندفن في بلده ...

هي القاهرة حتلاقيها منين ولا منين ..

الحكمدار ـ على رأى سيادتك المسألة عاوزه حل فعلا . . شريف ـ عاوزه حل ذاتى . . الحلول الذاتية مفيش أعظ

_ عاوزه حل ذاتي . . الحلول الذاتية مفيش اعظم منها احنا كان عندنا في الشارع الوسطاني في الحي حفرة كانت العربيات تدوس عليها السوستة تنكسر او تتاكل وتقدر حضرتك تقدر كان قد ايه من اقتصاد البلد بيروح هدر عشان الحفرة دى .. أنا حسبتها بالورقة والقلم ولقيت أنه كان بيمر على الحفرة دى في اليوم حوالي الف عربية ودا رقم متوضع جدا ونصهم بس السوستة بتاعتها بتنكسر والنص التاني بتتشرخ أو تتأثر بس يعنى معنى كده أنه بيضيع في اليوم الواجد خمسمية وخمسة وسبعين سوستة في عشرة جنيه السوستة بس يبقى بيضيع في اليوم خمستلاف سبعمية وخمسين جنيه . . بعني بيضيع في السنة ميتين واربعة آلاف ومانة خمسة وعشرين جنيه عملة صعبة يعنى مصنع صغير . . مصنع بنفقده في السنة عشان حتة حفرة صفيرة دا غير الوقود اللي بتستهلكه المربيات لما تضطر تنقل من التالت للتاني أو

للاول بعد الحفرة ما بتعوق سيرها وده برضه لا يقدر بثمن . . النقلة الواحدة تكلف الشيء الفلاني وخصوصا اذا كانت العربية بتاعة حضرتك كبيرة .. تصور سيادتك أنا لا يمكن أركب المرييات الكبيرة لأنها بتستهلك وقود كتير وكمان بتاخد مطرح كبير في الركن واحنا لإزم نكون حريصين على انتاج البلد واقتصاديات البلد والعربيات الصغيرة ممتازة جدا وعملية أنا ارتحت قوى في النصر ما عجبتنيش الفواكس وكمان النصر صنناعة محلية ومغيش داعي نركب عربيات من الخارج عشان نحافظ على العملة الصمية .. فتك في الكلام أنا لما لقيت الحفرة اللي في شارعنا بتضميع ٢٠٤١٢٥ جنيمه قلت دا عشر بن تلاتين حفرة من دول بضيعوا دخل السد العالى كله قمت على طول وجمعت أهالي الحي وقلت لهم لابد من الحلول الذاتية وحياتك في ساعة واحدة . . لاجل اليمين ساعة وربع كانت الحفرة اتردمت وإنقذنا اقتصاد البلد .. طبعها جالي جواب شهكر وقرروا تعميم الحلول الذاتية في كل مكان ..

(يتجه الى الاموات)

الحلول الذاتية يا حضرات ..

(يدخل احد الضباط ويهيى الحكمدار ويقف)

الضابط ــ الصحفيين عاوزين يقابلوا السادة الأموات . .

الحكمدار ــ صحفيين ايه بس . .

وده وقته .. فيه حظر نشر ..

الضابط ـ قلنا لهم قالوا احنا بنجهز نفسنا وأول ما القرار يتلفى ننشر على طول . .

شریف _ (متدخلا)

انا رایی تسمح لهم سیادتك احسن ، دول یعنی ، ، والا ایه

الحكمدار ــ على رايك احسن ما نقرا بكره عشر مقالات عن اختلال الأمن . .

(للضابط)

خليهم بيجوا ..

شريف ـ مفيش داعى تتكلم قدامهم عن حل المشكلة . . الحكمدار ـ برضه احسن . .

(يعود الضابط وهو يقود عددا من الصحفيين والمصورين ومندوبة للاذاعة واخرى للتليفزيون وكذا مصور يحمسل كاميرا للسينما يصلون ويبدأ المصورون في التصوير .. « أحد المحفيين تسير بجواره نجمة سينمائية مشهورة))

الحكمدار ـ احنا بنرحب بالسادة الصحفيين ونرجو الا يطيلوا فالاخوان حالتهم الصحية مش حسنة تماما وخصوصا بعد المشوار الطويل اللي قطعوه من سينا لحد هنا ..

السكرتير ــ دا علاوة على انهم ميتين زى ما حضراتكم عارفين من سنة ونص . .

صحفى _ كام سؤال صغيرين خالص . .

الحكمار ـ الجماعة دول من سنة ٦٧ ودول من سنة ٨٤ تحبوا تسألوا مين الأول . .

صحفى ــ طبعا بتوع سنة ٦٧ اخوانا دول لا مؤاخــ ذة يا جماعة بقوا تاريخ خلاص ..

(الصحفيون يتجهون الى الجنود الخمسة ويحيطون بهم ويبداون في الاسئلة وأثناء ذلك عمليات التصوير على اشدها) . .

صحفى ـ أيه شمور حضراتكم لما رجعتوا للحياة ..

عبد الفقار _ مفيش حاجه . .

صحفى __ ايه الدافع اللي خلاكم تقوموا وتيجوا هنا ..

عبد الففار ــ عشان نندفن في بلدنا ..

صحفی _ طب ما سینا بلدنا

عبد الففار ــ ايوه ما احنا عارفين اصل الحكاية طولت قوى..

صحفى ـ ايه رايكم في القاهرة بعد ما غبتوا عنها المدة دي؟

عبد الففار ــ ما شفنهاش

صحفى _ بتشوفوا برامج التليفزيون . .

عبد الففار _ لا . .

صحفى _ انما فيه تقدم مش كده

عبد الففار ـ ما نمر فش . .

صحفى _ ايه امنية حضراتكم اللي تحبوا اننا نحققها لكم..

عبد الففار _ انتوا عارفين . .

منيمة __ تحبوا توجهوا عن طريق الاذاعة كلمة للشمب..

عبد الففار _ قولو لهم احنا قلقنا . .

مديعة ــ تحبوا تسمعوا ايه من الأغاني ...

عبد الففار _ أغاني أ

مديمة ــ أيوه من الأغاني . .

عبد الففار ــ عاوزين نسمع سبع سواقى بتنعى لم طفولى فار م.

مديمة _ قصدك الأغنية بتاعة الاستاذ عبد الوهاب . .

عبد الففار ــ لا مش كلها الكلمة دى بس ٠٠ سبع سواقى بتنعى لم طفولى نار ٠٠

(يتقدم الصحفى الذى يقف بجوار المثلة ويدفعها في مواجهة الجنود)

الصحفى _ طبعا حضراتكم عارفين النجمة السينمائية الفنانة دعاء ...

عبد الففار _ لا ...

الصحفى .. الفنانة دعاء اول ما سلمعت عن حكايتكم قررت انها تنتج فيلم عنكم وعن الحكاية بتاعتكم دى وهى يسعدها انها تأخذ شوية صور معاكم عشان تسافر بكره تبيع الفيلم في بيروت . . عندكو مانع . .

(لا ينتظر جوابا بل يدفع دعاء ليوقفها في وسطهم . . ويقف بجوارها هو الآخر . . تبدأ الكاميرات في التصوير . .)

دعاء ــ أنا سميدة خالص . .

(تخرج دعاء وتقف بجوار المحض وتهمس في اذنه)

دعاء __ ربحتهم وحشة قوى . .

الصحفى ــ مش داوقت . . مش داوقت . .

(الحكمداد والسكرتي اللذان كاتا يقفان بميدا يقبلان)

الحكمدار ــ اظن كفايه كده . .

الصحفي ــ احنا ما صورناش حضرتك مماهم . .

الحكمهار ــ مفيش داعى . . أنا أكره الدعاية الشخصية جدا . .

الصحفي	ــ مش معقول
	(الحكمداريتقدم هو و السكرتير ويقفان بين الجنسود
	وتعور الكامرات)
صحفي	_ متشکرین قوی ۰۰
الحكمدار	ــ مع السلامة
شريف	_ احنا تشرفنا بمقدم صاحبة الجلالة الصحافة
صحفي	_ دا واجب ، احنا صحافة الشعب ودائما في
	خدمة الشعب
	(يسير الصحفيون بميدا)
الحكمدار	_ والعمل دلوقت
شريف	_ زى ما قلت لحضرتك مغيش غير الحل الذاتي .
الحكمار	ــ ايوه ما أنا عارف انما ازاى
	(يتقدم الميت)
عبد المال	_ أنا مع الأستاذ شريف احنا مستعدين نحل
	المسألة حل ذاتي بس بشرط
الحكمدار	_ ایه هوه
عبد المال	ــ سيبونا لوحدنا شوية
الحكمدار	_ نسیبکم لوحدکم ازای
عبد المال	_ ادونا فرصة احنا الأموات نحل مشاكلنا حل
•	ذاتی
شريف	ـ مفيش مانع نقف احنا بعيد واتصر فوا أنتم
عبد المال	ـ بعيد خالص وحضراتكم وكل الأحياء
الحكمهار	_ والحراسة
شريف	ــ مملش من بعيد برضه
	(الحكمدار يتقدم من الجنود الخمسة)
A sold!	ر ایک کلیم در شاه

عبد الففار ــ سبع سواقی بتنعی لم طفولی نار سبع ســواقی بتنعی لم طفولی نار ...

(عبد الفغار يردد هذا المقطع والحكمدار والسكرتير والمامور والضباط والجنود ينسحبون وهو يردد المقطع وانناء ترديده ينزل الستار)

_ ســـنار _

اللوحة السابعة

النظس :

(ساحة بقرية غرين .. حلقة من الفلاحين تتوسسطها مذيمة الاذاعة تمسسك بيدها المايهاك وعلى الارض جهاز التسجيل واحد المهندسين يمسك به امام المذيمة .. تقف سيدة كبيرة السن وبجوارها الممدة ..)

العمدة ــ آدى أم عبد الففار يا ست هانم . .

الذيعة مرسيه قوى يا عمدة . . انتى يا ست حضرتك أم عبد الغفار

السيبة ـ أيوه . .

المديعة __ (تقرب من فمها المايهاك وتتحدث)

سيداتى وسادتى .. حلقة جديدة من برنامج على الطبيعة نحن نتحدث اليكم الآن من قرية غرين مركز منوف محافظة المنوفية ومعنا الآن والدة الشهيد عبد الغفار السيد ..

حضرتك أم المرحوم عبد الففار ..

(تقرب المايهاك من فم السيدة)

السييدة __ أيوه أنا أم عبد الففار . .

المديصة _ (تقرب المايهاك من فمها)

وایه شعور حضرتك لما سمعتی أن المرحوم عبد الفقار رجع للحیاة ..

(تقرب المايهاك من فم السيدة)

السبيعة ــ عبد الففار مش مرحوم ...

عبد الففار ماماتش . .

المذيعة _ (تقرب المايهاك من فمها)

- ان السيدة الفلاحة البسيطة تأبى أن تعترف أن ابنها قد مات لأنه سيداتي وسادتي الشهداء لا يموتون « بل أحياء عند ربهم يرزقون » . . صدق الله العظيم . .

ایه شیعور حضرتك لما سیمعنی أن أبنك عبد الففار رجع للحیاة ..

(تقرب المايهاك من فم السيدة)

السسيدة ــ لما قالولى عبد الففار مات أنا ماصدقتش عشان أنا حاسة م الأول أنه ع الدنيا وكت كل ليلة باشوفه في المنام .

المذيعية ـــ ا تقرب المايهاك من فمها) أيوه انما اللي ثابت انه توفى الى رحمية الله منذ سنة ونص .

(تقرب المابهاك من فم السيدة)

السيدة ــ لا .. هو كان غايب بس .. واهو رجع أهوه.. المديدة ــ لا .. هو كان غايب بس .. وأهو رجع أهوه..

_ ازای یا ام عبد الغفار ابنك توفی الی رحمـــة الله مه

(تقرب المايهاك من فم السيدة ..)

السيبة __ لا يا بنتي . . ابني ماماتش . .

(اللابعة تدوس زرا في المايهاك وتسقطه بيدها وتتحدث ...

في عصبية)

الذيهــة ـــ انت راسك ناشفة قوى يا أم عبد الففار .. لازم يكون ابنك مات ..

السيدة ـ ليه بس انتى بتقولى عليه . . الله يسامحك يا بنتى . .

الذيهــة ـــ ماهو لازم يكون مات من سنة ونص عثمان لمــا يصحى دلوقت يبقى له مفاجأة ..

السييدة ــ مفاجأة أيه يا بنتى . . الشر بره وبعيد . .

الذيعة ــ امال اذا كان ماماتش يبقى ايه الغريب فى الموضوع .. يبقى احنا بنعمل الحديث ده ليه ..

السيعة _ انا عارفه يا بنتى . .

الذيعة _ (للعمدة)

اتصرف بقى معاها . . جهل فظيع . .

العمدة _ (ضاحكا)

يا ست هانم ما تاخديش على كلامها ٠٠ اصلها عدم المؤاخذة كبيرة في السن ٠٠٠

الذيهـــة __ (بانفعال تقرب المايهاك من فمهـا وتتحدث وحدها)

الست مندهشة جدا وتقول كلام كتير خالص وانا دلوقت حاسالها عن حياتها في هذه القرية الهادئة ..

يا أم عبد الففار ..

(تقرب المايهاك من فم السيدة)

السيدة ـ ايوه يا بنتى . . الديمة ـ (تقرب المايهاك من فمها) انتى سعيدة بحياتك في القرية ...

(تقرب المايهاك من فم السيدة)

السيدة _ الحمد لله يا بنتى . .

المذيعة _ (تقرب المايهاك من فمها)

السيدة أم عبد الففار سعيدة في كفاحها من أجل زيادة الانتاج وهي بتعمل بالحقل اتناشر ساعة في اليوم ..

بتحبى الزراعة والعمل في الحقل ...

(وتقرب المايهاك من فم السيدة)

السيدة ــ الحمد لله مستورة . . اطلع الزراعة . ليه الناس برضه بتحن عليه وبتساعدني . .

المديعة _ (تقرب المايهاك من فمها)

السيدة الريفية البسيطة تشسيد بمساعدة الجهات الرسسمية لها وهذا ايها السسادة هو التطور الذي دخل على حياة الفلاح في بفدنا . . فبعد أن كانت المسالح الحكومية حربا على الفلاح أصبحت في خدمة الفلاح . .

أم عبد الففار . . تحبى تقولى حاجه تانية . .

(تقرب المايهاك من فم السيدة)

السيدة ـ كتر خيرك يا بنتى . .

الذيهــة ـــ (تقرب المايهاك من فمها) ودلوقت أحب أسألك تحبى تسمعي أيه . .

السيدة _ اسمع . .

العميدة _ (متدخلا)

ماهیاش فاهمة یاست هائم اختاری انتی حاجه لها ..

_ (تقرب المايهاك من فمها)

ولما سألت الست ام عبد الغفار تحب تسمعى ايه دموعها سالت على خدها وقالت بصوت ضعيف كله حب وحنان وعاطفة جيائسة . . احب اسمع اغنية ما احلاها عيشة الفلاح . . والأغنية دى بتصور تصوير دقيق انحياة الهادئة اللطيفة اللى عايشساها الست أم عبد الغفار والفلاحين وبتقول ما احلاها عيشة الفلاح مطمن قلبه مرتاح يتمرغ على أرض براح والخيمة الزرقه ساتراه . .

_ ســــنار _

اللوحة الثامنة

المنظسر:

(نفس الكان من مقابر الامام ولكنه تحول الى هيئة محكمة في الهواء الطلق .. في المواجهة منصة عالية كمنصات القضاء امامها ثلاكة مقاعد وامام المنصة دكك في شكل مقاعد .. الكان مزدهم جميعه بالاموات الذين يرتدون الاكفان البيضاء .. زاد عددهم جدا .. يلمع بينهم اليت الذي عارض في دفن الجنود الخمسة مع المحاربين .. الجنود الخمسة يجلسون على احد الدكك في نهزه القاعة ..

الجميع في حلقات والحديث يدور بينهم في حماس .. وفجأة يقف الميت على دكة ويوجه الحديث للجميع)

- فى الحقيقة يا اخوان يبدو أن القضية تتطور تطورا هاما خطيرا . لقد بدأت بنزاع بيننا نحن شهداء حرب ١٩٤٨ وبين اخواننا الذين قتلوا في سنة ١٩٦٧ وكان المفروض أن نجتمع نحن وهم ونناقش المسألة فيما بيننا ونصل فيها الى حل ولكن يبدو أن الخبر قد انتشر بسرعة وخاصة بين اخواننا من الأموات وقد وصلت الآن الى مكان اجتماعنا وفود كتيرة من مختلف أنصاء البلاد ومن مراحل تاريخية مختلف . . لقد اراد الجميع أن يشاركونا حل هذه القضية التى ارقتنا جميعا ونحن ازاء هذه القضية التى ارقتنا جميعا ونحن ازاء هذه الظروف لا نملك أن نمنع أحداً من المشاركة فى البحث عن

عبد المال

حل ولكننا امام فترة زمنية بسيطة تستوجب منا الاختصار والتركيز الشديدين حتى نصل الى حل قبل شروق الشمس لذلك فأنا أقترح ان نختار الآن فورا هيئة المحكمة من رئيس وعضوين وأن يبدأوا فورا في طرح القضية بسماع وجهات النظر المختلفة للوصول الى الحكم المادل.

والآن أنا أدعو حضراتكم لكي يتقدم من يرى نفسه أهلا لمنصب القضاء أن يتقدم بترشيح نعسته . .

_ انا اقترح ان يكون القضاة من المحايدين . . ميت يعنى لامنكم ولا منهم ...

> - وانا اوافق على هذا الرأي .. عبد المال

(يتقدم احد الاموات ويرتقى دكة ويتحدث)

- أنا أرشح نفسى لهيئة القضاة .. الورداني

- تسمح تقدم نفسك .. عبد العال

_ أنا أبراهيم ناصمف الورداني قتلت رئيس الورداني الوزراء بطرس غالي لانه حاول مد امتياز قناة السويس وحكم على بالاعدام ..

وأعدمت في سنة ١٩٢١ .. وأنا أعتقد وقد ضحيت بحياتي في سبيل قناة السويس اني قربب من المشكلة اليوم . . لذلك فأنا أرشح نفسى كواحد من القضاة . .

> ـ نمم . . لا . . نمم . . لا اصبوات هيبت

_ أنا لا أوافق نقضيتنا نزاع بين طائفتين نقدت

حياتها فى الحرب . . وسيادتك فقدت حياتك بحكم من احدى المحاكم لذلك فانت بعيد كل البعد عن هذه القضية . .

الورداني ـ انا ارى العكس على خط مستقيم . فالعبرة ليست بالطريقة التى فقد بها الانسان حياته بل بالسبب الذى من أجله فقد الانسان حياته . .

سيت مناك قضية على الأمر كذلك فليست هناك قضية على الاطلاق فالذين ماتوا في سينا سنة ٤٨ والذين قتلوا من أجل سبب واحد . . اذن لاقضية ولا يحزنون . .

(يخرج من بين الاموات شيخ يقف ويتحدث)

الطبى ــ ان الزميل الوردانى قتل مصريا يتعاون مع الاستعمار اما انا فقتلت استعماريا واضحا بل هو قائد الاستعمار نفسه فأنا ارى نفسى أجدر بمقعد القضاة من ابراهيم ناصف الوردانى .

ميت ـ حضتك مين ؟

الحلبي ــ انا سليمان الحلبي قاتل كليبر رأس الاستعمار الفرنسي في مصر ...

اصبوات _ نعم . . لا . . نعم . . لا

(يصمد الى المنصة شيخ وقور يتحدث)

البشتيل ـ لقد قتل كل منكما فردا مهما كانت قوة هذا الفرد ومهما كانت سطوته اما أنا فقد شاركت في قتل جيش باسره وأنا أرى في نفسى ما يجعلنى أهلا لمنصب القضاء في هذه القضية . .

_ قدم نفسك .. ميت _ أنا الحاج مصطفى البشتيل قاهر الفرنسيين البشتيل في بولاق واحد زعماء نورة القاهرة الثانية ... أصسوات ـ نعم . . لا . . نعم . . لا (يصعد النصة ميت شاب) عبد الواحد ـ الحاج مصطفى البشتيل صحيح قاد ثورة ضد الفرنسيين في مصر ولكن الفرنسيين ماخرجوش الا بعد كده بمدة طويلة أما أنا فشاركت في هزيمة الصليبيين وفي اسر قائدهم لويس وانا احق بالكرسي من كل اللي سبقوني . . ـ قدم نفسك .. ميت _ انا عبد الواحد عبد السلام فلاح من فارسكور عبد الواحد مدرية الدقهلية .. (يتقدم احد الاموات ويرتقى المنصة) اخوانى اللي سبقوني اعادونا الى فترات بعيدة عدنان من التاريخ انما أنا اشتركت في مقاومة مسلحة كان من نتيجتها خروج الاستعمار الانجليزي سنة ١٩٥٦ ولذلك وتقرب صلتى بالحوادث فأنا أرشيح نفسى لمقمد القضاء .. _ قدم نفسك .. صــوت انا عدنان المدنى طالب . . استشهدت بين عدنان كتائب مقاومة الاحتلال الانجليزي سنة ١٩٥٦ في منطقة القناة .. ـ نمم . . لا . . نمم . . لا اصبوات (بدخل الى القاعة شيخ مهيب الطلعة يرتدى الكفن ويسير خلفه اثنان يرتديان الاكفان يشق الجمع وعنسد ما يشاهده بعض الاموات ترتفع أصواتهم) _ احمد عرابی . . عرابی . . باشا . .

مسوت

اللوحة التاسعة

النظـر:

(على الطريق المرصوف الموصل الى مدافن الامام .. الطريق مقطوع من الجانبين فلا مرور عليه .. يظهر بعيدا عدد من عساكر الشرطة يحيطون بالمقسابر ويقف خلفهم مجموعة كبيرة من الاهالى يتحدثون ويشيرون الى المقابر من بعيد في جانب من الطريق يقف الحكمدار والمأمور ومجموعة من الضباط والسكرتي ..)

الحكمهار ــ وبعدين .. بيعملوا ايه بس لحد داوقت .. شريف ــ أنا واثق باسيادة الحكمدار الهم حسستجيبوا لندائي ويحلوا مشكلتهم حل ذاتي ..

الحكمدار ــ انا ماقلتش حاجة بس عاوز أعرف بيعملوا ايه قبل النهار ما يطلع . .

المامور ـ سبادتك تتطمن في ظرف دقائق حنعرف كل حاجة حصلت من ساعة ماسيبناهم هناك . .

المكمدار _ حنعرف ازاى بس ٠٠

المامور ــ ماتحملش ســــيادتك هم أنا عامل ترتيبي كويس ٠٠ كويس ٠٠ أهو جه أهو ١٠٠

(ينظر الى الطريق ويقترب من ناحية المدافن رجل طويل عريض يرتدى الكفن الابيض)

الحكمهار. ـــ ايه ده دا واحد منهم جاى لنا لازم وصلوا لقرار ..

المامور _ (ضاحكه)

دا مش واحد منهم یا افندم .. دا واجهند من رجالتنا ..

_ ولايس . . آه . . الحكمار ۔ ﴿ نضحك) المامور طبعا يا افندم ميت زيهم بالظبط أنا اشتريت له الكفن في ربع ساعة بالطبط .. (يصل الخبر الذي يرتدي الكفن ويحيي) المخبر - تمام يا أفندم .. ـ خبر عملوا ایه . . الحكمار عملوا محكمة . . المضر - محكمة .. محكمة اله .. الحكمدار _ محكمة عشان تفصل في القضية بين الطرفين المخير المتنازعين . ـ وفيه قاضي .. الحكمدار ــ ايوه قاضي كبير قوى . . المخير _ والقاضي واحد ميت ؟ الحكمدار - سعادة عرابي باشا با افتدم . . المخير _ مين . . عرابي باشا . . المكمدار _ احمد باشا عرابي يا أفندم . . المخبر - وده ابه اللي جابه .. الحكمار _ دا فيه ناس كتير قوى ميز السادة الاموات المخبر وصلوا يا انندم بين عاد التوالية وات وزيطة کیرة اوی یا افتدم www.Books4aw.wet - اوعى حد يكون خد باله منك .. المكميار (harman) _ الخبر عيب يا أغنهم دا أنا كاني واحسد منهم بالظبوط ... ـ ماشافوکش وانت جای علی هنا ؟ اللمور - لا يا افتقام انا انسمهبت من غير مايشوفوني . . النخبر

ـ طب ارجع، دلوقت وكل خمس دقائق تيجي 1 Shoule تىلفنا .. المخبر _ حاضر يا أفندم .. (المخبر يحيى ويبتمد ويتوقف عند ما يناديه الحكمدار) - تعالى هنا .. الحكمدار (المخبر يمود ويحيي) ـ ایه اللی انت لابسه فی رجلیك ده ؟ الحكمدار (المخبر ينظر الى قدميه وكذلك المامور والضباط ... المغبر يرتدى حذاه المساكر الفنخم) الحكمدار - فيه ميت بيدفنوه بالجزمة المرى ؟ . ۱ مضطرب) المخبر نسيت اقلعها يا افندم ... (يبدأ في خلمها) -وبتقول ماحدش منهم خد باله والا افتكروك الحكيدار مت بالجزمة ... _ حاضر يا افندم . . المخير (المخبر بسلمالحذاء لاحد زملائه ويحيى ويسرعمبتعدا) ۔ (مضطربا) المامور عینی . . (الحد الضباط الدين يرتدون اللابس المنية) مالقينش غير ده تبعته ... ۔ انا کت فاکرہ بیفهم .. الضابط - أنا حا أروح أبلغ الملومات دى بالتليفون .. الحكمدار وارجع حالا ... المامور ـ اللاسلكي موجود في المزبية والما كمان لازم أبلغ ... شريفي (يبتطر التعليمار والسكرتي وتطفهم عدد من الضياط .

بعد لحظات يضفط جموع الاهالي على المساكر في الكردو	
بينهم بعض النسوة)	
 یاکبیدی یا اولادی ۱۰۰ دول زمانهم باعینم 	امراة
مغرفرين من البرد	
_ مفیش حد عنده انسانیة بودیلهم شویة بطاطین	رجل
 ولا أكل تلاقيهم باضنايا ماكلوش حاج 	المراة
والدنيا صيام	
_ ابعدی یاست ابعد یاعم	عسكرى
– احنا واقفين اهوه احنا عملنا حاجة	الرجل
_ طب اتلم انه وهيه وشوفوا حالكم احسن	عسنكرى
(الرجل ببتعد والمراة تقترب عن المسكري)	
 دالنبی باشاویش ماتعرفش اسامیهم 	المراة
ــ اعرف منين وانا واقف معاكى اهوه	المسكري
_ اصل لی اسم النبی حارسك ولد راح منم	المراة
ياولداه راح باقول يمكن يكون منهم .	
دا کان حنین قوی	
_ ربنا يصبرك ياست	المسكري
_ (بین دموعها)	المراة
أشوفه بس أشوفه بعيني مرة واحدة	
- ربنا يصبرك ياست	المسكري
(الراة تبدأ في البكاء ويقبل رجل يجدبها بميدا .	
يقترب شابان يقف احدهما ويجذبه الآخر ويتحدثان }	
- طول بالك بس شايف	الشاب ١
_ ياجدع بطل كلام فارغ انت مصدق .	الشاب ٢
_ قدامك أهم لابستين أبيض في أبيض	الشاب ١
- تلاقيهم بيصوروا فيلم والاحلقات تليفزيون	الشاب ٢
ب فيلم إيه بس والمخلق دى كلها	الشابي إ

ـ انت لسه بنسال ع الخلق ذي كلها كفايه كلمة واحدة علشان تلمهم على طول	الشاب ٢
_ والظباط والمساكر دى كلها	الشاب ١
_ ماهم دول برضه بيجيبوهم في تصوير الأفلام.	الشاب ٢
 بالكمية دى العدد دا كله 	الشاب ١
ـ يمكن فيلم مشترك تعالى يالله بلاش كلام فارغ	الشاب ٢
(يسيران ويقبل رجليرتدي اللابسالبلدية وممه شيخ)	
ـ دا اندار يامعلم اندار	الشيغ
ـ اندار بایه بس ۰۰	الملم
 بالنهایة العالم کفرت ، ربنا بعت اندار للناس دی بدایة نهایة العالم یامعلم 	الشيغ
- ازای بس هی الناس عملت آیه	الملم
- عملت ايه ؟ عملت كتير الفجور اللى فى كل حتة ترك الدين الذمم الخربة الكذب والسرقة والزنا . دى مش كلها جرائم نهى عنها الخالق سبحانه وتعالى	الشيغ
ــ ايوه بس انذار يقوم جل جلاله يصحى عساكر مدنونين في الصحرا	الملم
- یحیی العظام وهی رمیم یامعلم انت حتکفر والا ایه ؟	الشيغ
۔ اللهم لا اعتراض بس باقول لو كان انذار عشان الناس كفرت كان احيا (نبيا رسولا)	الملم
- ومالهم المساكر يامعلم دا احياء دول بالذات من ارض سينا له مفزى عظيم	الشبيغ
ــ ازای ۰۰	الملم
- مش دى طورسينا حيث خاطب الله موسى عليه السلام	الشبيغ

ـــُ 'ای والله ماخدتش بالی	Mall
- بافولك انذار وبكره تشوف	الشيغ
 ـ (يقرأ الفاتحة بصوت مرتفع) 	plall
(يسيران وتقبل سيدتان ترتديان ملابس فاخرة ومعهما	
· شا ب)	
- عشان تقول لاونكل اننا شفناهم بنفسنا	فتاة ١
۔ مش حیصدقنی	الشاب
 ما احنا حانقول ان احنا شفناهم معاك 	فتاة ٢
- مش حبصدق حيقول برضه دول عاملينها	الشاب
عشان يشغلوا الناس عن حاجات تانية	
_ انما صحيح احنا شفنا ايه	فتاة ١
 ماقدامك اللى احنا شايفينه اهوه 	فتاة ٢
_ أنا مش شايفه غير العساكر دول	فتاة ١
(تشبح الى المساكر)	
£	
وناس بعيد أهم ، ،	
وناس بعيد اهم ، . - مش لابسين أبيض قدامك أهم	فتاة ۲
•	فتاة ۲ فتاة ۱
- مش لابسين ابيض قدامك أهم	
- مش لابسين ابيض قدامك أهم - انما أيش عرفنا أنهم ميتين كانوا ميتين يعنى ا	فتاة ا
- مش لابسين ابيض قدامك اهم انما ايش عرفنا انهم ميتين كانوا ميتين يعنى ا - انا عارفه بقى	فتاة ۱ فتاة ۲
- مش لابسين ابيض قدامك اهم انها ايش عرفنا انهم ميتين كانوا ميتين يعنى ؟ - انا عارفه بقى يعنى حاتقولوا ايه لاونكل حنقول له اللى شفناه	فتاة ١ فتاة ٢ الشاب
- مش لابسین ابیض قدامك اهم - انها ایش عرفنا انهم میتین كانوا میتین یعنی ا - انا عارفه بقی - یعنی حاتقولوا ایه لاونكل	فتاة ا فتاة ۲ الشاب فتاة ۱
- مش لابسين ابيض قدامك اهم - انما ايش عرفنا انهم ميتين كانوا ميتين يعنى ؟ - انا عارفه بقى - يعنى حاتقولوا ايه لاونكل - حنقول له اللى شفناه - والنبى يظهر عنده حق اونكل وكلها لعبة - انا برضه باقول كده - هم لازم كده دا يبقى اونكل مخه كبير اوى	فتاة ا فتاة ا الشاب فتاة ا فتاة ا
- مش لابسين ابيض قدامك اهم - انها ايش عرفنا انهم ميتين كانوا ميتين يعنى ؟ - انا عارفه بقى - يعنى حاتقولوا ايه لاونكل - حنقول له اللى شفناه - والنبى يظهر عنده حق اونكل وكلها لعبة - انا برضه باقول كده - هم لازم كده دا يبقى اونكل مخه كبير اوى . فهمها وهو قاعد هناك في البرتيته	فتاة ا فتاة ا الشاب فتاة ا فتاة ا فتاة ا
- مش لابسين ابيض قدامك اهم - انما ايش عرفنا انهم ميتين كانوا ميتين يعنى ؟ - انا عارفه بقى - يعنى حاتقولوا ايه لاونكل - حنقول له اللى شفناه - والنبى يظهر عنده حق اونكل وكلها لعبة - انا برضه باقول كده - هم لازم كده دا يبقى اونكل مخه كبير اوى	فتاة ا فتاة ا الشاب فتاة ا فتاة ا فتاة ا

(يخرجان ويقبل شابان واضع أنهما من العمال)

ـ انا لوشفتهم العرفهم الشاب ١ الشاب ٢ _ ازای .. الشاب ١ ـ انا حاربت في سينا ورجعت سليم .. سيمنى شفت كل اللي ماتوا في سينا .. الشاب ٢ _ ما شفتهمش کلهم طبعها باحس بیهم ازای الشاب ١ ما تعرفش . . الشاب ٢ ـ تحس بيهم ٠٠ ـ وحباتك ساعات اطلع الترماي ابص في وش الشاب ١ الواحد احس على طول انه كان هناك . . أسأله يطلع مظبوط ... الشاب ٢ ـ غربه . . ـ زى اللي يكون مكتوب على وشهم .. الشاب ١ _ انا شخصیا ما اقدرش آمیزهم عن ای حد الشاب ٢ تانی . . _ اصلك ما كنتش هناك . . اللي راح عناك يقدر الشاب ١ يمرفهم . . الشاب ٢ س من بعيد . . الشاب ١ ـ هو اللي حصل دا شوية ... الشاب ٢ ـ ما حدش يقدر يقول كده .. (يخرجان وتقبل نرجس ومعها زميلة لها) - اهو أنا كت جايه من هنا هوه ٠٠ نرجس (وتشي بيدها) الزميلة ـ لوحدك ... نرجس ـ يمنى ٠٠ الزميلة ـ وبعدين ..

_ وبعدین راح هاجم علی وقال لی انا باحبك یانرجس	نرجس
۔ ریاں دو۔ ۔ وعرف اسمك ازاى	الزميلة
- أنا عارفه دول مكشوف عنهم الحجاب مش بسم الله الرحمن الرحيم عايشسين في الآخرة	نرجس
_ وبعدين	الزميلة
ر. یا ـ آنا شفته کده مبهدل ومتمور افتکرته سوابق	نرجس
انما قلت بابت ماتستمجلیش قلت له مماك	0.5
فلوس	
_ هيه وبعدين	الزميلة
_ قال لى كل اللى تطلبيه بصيت لقيت وراه	نرجس
أربعة من زمايله خفت جريت رحت للشاويش	
رشوان وعم رضوان حاشوهم عنی یا عینی یا شاویش رشوان	
_ هو جراله آیه	الزميلة
_ حطوه في القميص وخدوه ع الخانكة	نرجس
وعم رضوان • •	الزميلة
ـ من ساعتها قاعد في الجامع يصلى	نرجس
ے وانتی سابوکی	الزميلة
_ حطیت سؤالی وسابونی طبعا آه یا ناری	نرجس
لو كنا عرفناهم من الأول	0-, 3
ــ مالكيش بخت	الزميلة
ـ قسم الواحدة حتاخل غير نصيبها	نرجس
(تسيران ويقبل الحكمدار وخلفه السكرتي والمامور	
والضباط)	
- ماجاش المخبر بتاعك ··	المكمدار
۔۔ زمانه جای یا افندم	المامور

المكمعار - لو أعرف بيعلموا أيه دلوقت . . ـ دلوتت نمرف .. المامور ـ بس قبل النهار ما يطلع . . المكمار (بنظر في ساعته) اسمع . . أنا عندى فكره . . _ خيريا افندم .. المامور ــ نشوف لنا كفنين ونروح معاهم نشوف بنفسنا الحكمدار ابه الحكاية _ (منزعجا) المامور مفيش داعي يا افندم للمخاطره دي .. ثم أن سيادتك مش ملك نفسك . . أنت ملك البلد كلها . . _ (متأملا) الحكمدار فكرك كده .. _ طبعا يا افندم .. طبعا .. المامور (مصدقا) .. شریف 🕯 امال یا افندم امال ..

_ ســـتار _

اللوحة العاشرة

	المنظس :
(مكتب مدير تحرير الجريدة مدير التحرير يجلس	
يدخل سامي وفؤاد والمحررون)	
_ هيهخي ؟	المدير
ـ جاهزين جدا الموضوع فاضل فيه ورقة	سامى
وَاحَدُهُ وَالْصُورُ فِي النَّحَمَيْضِ	
_ (لغۇاد)	المدير
وانت	_
_ ولا خمسين خبر حانزلهم طبعا كل يوم ثلاث	فؤاد
اربع أخبار	
ـ عرفت تاخد منهم حاجات انسانية	المدير
_ كثير قوى رأيهم فى كل حاجة حتى فى الازياء	فؤاد
في الميني جيب والمكروجيب	
_ (بسعادة)	المدير
مش معقول	
_ اطمئن جدا	فؤاد
دا أنا ما بقتش الاحق اكتب دول رغايين	
رغی ۰۰	
ـ هایل بس حیسمحوا بالنشر بقی	المدير
ـ بالكتير بكره	سامى
۔ انا خایف یسمحوا دلوقت	المدير
 ع العموم أنا حائزل كل حاجة المطبعة وتبقلى 	سامي
تَقْراها في البروفات	
۔ ونزل الصور برضه بس شوف حد كويس	المديو
يوضّب لك الصّفحة	-

ـ صفحة مين داع الأقل تلت صفحات	سامي
- كويس وماله شيل اى حاجة بس سيب	المدير
صفحات الاعلان هي الناس عاوزه تقرأ حاجة	
غير الحكاية دى	
_ طبعا طبعا	سامى
•	-
_ ـ ناقص الافتتاحية ـ كمان الافتتاحية	المدير
· · · · · · · · · · · · · · · · · · ·	سامی الده
_ أمال دى رأى الجريدة والجريدة لازم يكون الما أم	المدير
لها رای فی موضوع خطیر زی ده	
ــ يمنى عاوزنى أكتبها	سامی
_ لا ربع نفسك أنت أنا بعت جبت الاستاذ	المدير
متولى م البيت يبجوا يشتغلوا حضرات الكتاب	
المحترمين يشتغلوا صحافة بقى	
۔ انا شایفه بیکتب بره	سامي
_ طبعا بقاله ساعتين بيكتب لازم يشرب	المدير
القهوة ويعمر الطاسة ولا كانه بيكتب الحرب	
والسلام	
ـ احنا اللي غلابه	سامي
_ مطش روح انت الطبعة وانت كمان يا فؤاد	
	المدير
تطمن على أخبارك بنفسك وانت يا سامي خليك	
على اتصبال بالتحقيق عشان قرار حظر	
النشر ٠٠	
_ اطمن ما تاخدش في بالك قبل ما يتكتب ع	سيامي
المكنة حيكون عندي علم أنا عامل ترتيب مع	
عمال تليفونات البلد كلها الليلة دى	
- طیب شد حیلك	المدير
(يخرج سامي وفؤاد ويدخل متولي وبيسده ورق	
يجلس ٠٠٠)	
_ اهلا اســـتاذ متولى اياك يكون ربنا فتح	متولى
مليك	

۔ یعنی ۱۰	المدير
- أيه التواضع دا يا راجل دا أنا مش متخيل	متولي
الجريدة بتاعتنا من غير قلمك صحيح انت	
ما بتمضيش الافتتاحية انما الناس كلها عارفه	
انك انت اللي بتكتبها	
۔ يا سيدي المفو	المدير
_ انشاء الله كتبت لنا ايه	متولي
- كتبت افتتاحيتين	المدير
ـ اتنين	متولي
_ على سبيل الاحتياط ما حدش عارف	المدير
الظروف	
_ ظروف	متولى
_ الحكاية لفاية داوقت ما وصلتش لنتيجة محددة	المدير
وما أعرفش هل حتكون شيء كويس أو شيء	
وحش قلت أكتب لكل حالة افتتاحية عشان	
نكون جاهزين	
ـ وما نجيبكش من البيت تاني آه يا حويط .	متولي
(يضحكان)	
ــ اقرأ كله وسمعنى ٥٠	المدير
_ طيب ما تاخدهم أنت تقرأهم على مهلك	متولى
_ اقرأ يا راجل أنا أحب أسمع الافتتاحيات	الدير
بالدّات بصوتك اقرا	
(متولى يخرج الورق من جيبه ويقرا)	
ـ دى الأولى	متولي
	G-J-
(يقسر)) لا ماها، خياط الباطنيير مياقاتمات،	1.0.
 لا شــك أن خواطر المواطنين جميما قد تعلقت مساء الأمس بما جرت به الاحداث في مقسابر 	متولي
الامام الشاقم ولا شك أن لذلك الحادث	

الخطير مفزاه المجليل . . انه ببساطة نداء من العالم الآخر بالأخف باسبناب الثقة والقوة وتحذير ممن سبقنا من الشهداء على طريق الكفاح ، ان هبوأ اعملوا وهذا واجبنا المقدس الذي نتجه جميعا اليه . ان النفوس الطاهرة التي اتجهت الينا بالنداء العظيم لعلى ثقة من انها تنادى شعبا لن يقر له قرار حتى يثار لشهدائه فيستقروا في جنات الخلد آمنين مطمئنين .

الدير ــ عظيم يا استاذ متولى عظيم . . ثم عقيم . . ثم عقيم . . ثم عقيم . .

شيء مقنع فعلا مقنع .. ' حاتقول آیه یا تری فی التانیة .. ؟

متولى _ طول بالك . . آدى التانية . .

(يخرج الورقة الثانية ويقرأ)

لا شك ان خواطر المواطنين جميعا قد تعلقت مساء الأمس بما جرت به الأحداث في مقابر الامام الشافعي والذي يدقق في الموضوع يرى ان الريبة والشكوك تحيط به من كل جانب . . فلا العلم ولا العقل يقبلان ما يردده المعض . . ولسنا خافين عن أهدافهم في اثارة الخواطر ولكنا نعرف متى وأين وفي أي وقت ولن تستطيع أي قوة مهما كانت أن تجعلنا نحيد عن خطنا المرسوم لتحقيق أهدافنا العظمى . .

الدير ــ عظيم . . مدهش . . أغرب حاجة أن الاثنين مع أنهم متناقضين . .

متولی ـ ع المموم عندك دى وعندك دى . . عاير منى حاجة تانى . .

المدير ــ متشكر با استاذ متولى ٥٠ الف شكر ٥٠

(يخرج متولى)

اللوحة الحادية عشر

المنظسر: (احمد عرابي قد جلس على المنصة وامامه على القاعد الجمهور في آخر الكان يجلس الجنود الخمسة على دكة متجاورين ينظرون وعرابي بدق النصة فيصمت الجميع . .) ـ عاوزين احد السادة الحضور كي يسجل وقائع عرابي المحكمة الخطيرة .. (لا يرد احد وينظر الجميع كل الى الاخر) ـ بنستخبى ليه يا شيخ عبد الرحمن . . فيه حد عرابي هنا يصلح أكثر منك للمهمة دى ... (نتجه الانظار الى شيغ بجلس في النهاية يقف وهو بكاد يتوارى . .) ـ أنا ما ليش شأن يا سعادة الباشا بهذه الأمور عيد الرحن .. لقد طلقتها منذ طلقت الدار الفانية .. _ اذا كان لا بغتى ومالك في المدينة .. فاعتقد عرابي انه لا يستجل وعبد الرحمن الجبرتي في القاعة . (همس مرتفع) الجيرتي ٠٠ الجبرتي ٠٠ اصوات ـ يا سيادة الرئيس لقد قضيت حياتي في الدار الجبرتي الفائية اكتب واستجل وتركب كل ما كتبت لابنائنا حتى يتعلموا من التاريخ ويفيدوا من حوادثه فهل تعلموا .. _ رابك انت .. عرابي - كل ما أعلمه أن الفائدة التي حصل عليها الأحياء الحبرتي من كل ما كتبت انها تحولت على أيديهم الى حلقات يديمها الراديو . . _ تقدم يا شيخ عبد الرحمن ولا تيأس من ابنائك عرابي

.. واذا كانت قد فاتتهم واحدة فلن تفوتهم الثانية . . وانا ضامن لك هذا . . ـ من أين يا سيادة الرئيس . . من أين تضمن لي الجيرتي ۔ مما يجري اليوم . . عرابي ـ منسا . . الجبرتي ـ منا وهناك . . تقدم يا شيخ . . عرابي (يتقدم الجبرتي مفلوبا على أعره وبجلس على طرف المنصة بجواد عرابي) سنريد قلما .. عرابي الحبرتي ۔ موجود . . (يخرج قلما من داخل كفنه) ـ الورق .. عرابي ۔ موجود انضا .. الحبرتي (يدس بده في صدره ويخرج رزمة من الورق ..) ـ على بركة الله .. عرابي نفتح الجلسة باسم الله الرحمن الرحيم . . نبدآ أولا باخواننا ألقادمين من سيناء . . من يتحدث عنهم ٠٠ (الانظار كلها تتجه الى الجنود الخمسة الذبن بتهامسون ثم يقف مبد الففار) ۔ تمالی یا اپنی .. عرابي (عبد الفقار يتقدم من المنصة) - حدثنا بالتفصيل عما حدت وكان سببا في كل عرابي هذا المناء ـ مفيش حاجة يا سمادة الباشا . . أنا وزملائي عبد الففار دول ٠٠ (يشيم الى زطاله في آخر القاعة)

القتلنا في سينا في يونية سنة ٦٧ والدفنا هناك وبعدين يا سعادة الباشأ جينا الليلة عشان نندفن هنا . . اخوانا ما رضيوش . . آدى الدور كله . .

عرابي

- وایه اللی جملکم تترکوا فبورکم فی سیناء و تأتون الی هنا ؟

عبد الففار

- احنا في الأول يا سعادة الباشا .. عرفنا ان احنا انهزمنا في الحرب قلنا وماله الناس على دى ودى والحرب كده ما حدش بيكسب فيها على طول .. وكنا فاكرين انه بعد مدة حترجع سينا الأصحابها .. ولما طال الوقت قلقنا قلنا نيجى ننسدفن في بلدنا مع اخواننا واهلنا احسن ..

عرابي

- انما ایه الدافع .. ایه اللی خلاکم تقوموا و تیجوا هنا ..

عبد الففار

الفربة وحشة يا سعادة الباشا وسعادتك سيد
 العارفين . .

عرابي

- أيوه يا أبنى صدقت . . أذا كانت غربة الأجساد قاسية فما أقسى غربة الأرواح . .

عبد الففار

ـ با سمادة الباشا احنا تعبنا قوى واستنينا كتي ..

عرابي

- تعبتوا قوى انا واثق من كده . . انما استنيتوا كتير دى مسألة ممكن نناقشها مع بعض . . الكتير في الحروب قد ايه . . شهر . . اتنين . . سنة اتنين تلاته . .

عبد الففار

ـ ومين اللي اعترض على انكم تندفنوا هنا ..

- احنا قلنا سنة ونص يبقى كتير وجينا ..

عرابي

ـ احنا . . احنا . .

مسوت

(بعض لابس الاكفان يقفون)

عرابي	۔ مین حیصرض رایکم
عبد المال	- أنا يا سعادة الباشا أنا عبد العال عبد الموجود
	استشهدت في حرب ١٩٤٨
عرابي	ـ انتوا اعترضتوا على انهم يندفنوا معاكم ليه ؟
عبد المال	ـ يا سعادة الباشا احنا ناس نعرف النظام
	نعرفه في الدنيا وفي الآخرة كمسان المدافن
	اللي احنا مدفونين فيها دى مخصصة للمحاربين
	واخوانا دول ماحاربوش يبقوا يندفنوا ممانا
	ازاى أنا قلت يروحوا يندفنوا مع الملكية اللي
	زيهم ٠٠
عبد الففار	_ يا سعادة الباشا نندفن مع الملكية ازاى
	احنا عساكر ومثنا في الحرب بقى دا اسمه
	كلام ٠٠
عرابي	_ حنسمع وجهة نظرك يا اخ عبد الففار كمل
	يا عبد المال
عبد المال	بس يا سمادة الباشا آدى الحكاية كلها
عرابي.	. واعتراضك منصب على آيه دول مجندين
	زيك بالظبط وقتلوا زيك في الحرب
عبد العال	_ لا يا سمادة البيه دول ماحاربوش أبدا
	حتى اسالهم كده
عرابي	ـ دول عساكر ماتوا في الحرب لابسين عسساكر
G. J	قدامك أهوه
عبد المال	_ ولا كل من ركب الحصان خيال يا سعادة
	الباشا
عرابي	_ یا عبد الففار یا ابنی انتوا رحتوا سینا

ليه .. ۴

عبد الففار _ عشان نحارب ..

عرابی ـ وحاربتوا . .

عبد الففار ـ لا . .

عرابی _ لیسه . .

عبد الففار _ ما نمرنش . .

عرابي ـ يا ابني ما تعرفوش ازاى . . مش الأعداء كانوا قدامكم . .

عبد الففار _ ايوه . .

عرابی _ وهجموا علیکم . .

عبد الففار _ أبوه . .

عرابی _ طب ازای ما حاربتوش . .

عبد الففار ــ استعدینا للحرب . . و فرق مننا هجمت وبعدین جتنا اوامر اننا ننسحب انسحبنا . . انسحبنا من قبل ما نحارب واصطادونا واحنا راجعین . .

عرابي ___ واوامر الانسحاب جتكم منين ..

عبد الففار ــ من فوق يا سعادة الباشا . .

عرابی ۔ فوق فین یا ابنی . .

عبه الففار _ هم قالولنا كده . . الأوامر جت من نوق . .

عرابى ــ امال كنتم رايحين تعميلوا ايه اذا كان اول ما ابتدت الحرب قالولكم انسحبوا . .

عبد الففار ـ كنا رابحين نحارب...

(يقف احد لابسي الاكفان ويرفع يده)

عرابی ــ ماذا ترید . .

الميت ـ عاوز أقول رأيي في الموضوع . .

عرابي _ انت مين . .

عویس محمدین کنت اومباشی فی جیش سعادتك وحاربت مع سعادتك فی التل الکبیر ...

عرابي ـ اتفضل . .

عويس ـ انا مش شايف فيه قرق بين اخوانا اللي حاربوا في سنة ١٩٤٨ واخوانا اللي حاربوا في سنة ٢٧ . . وفي سنة ٨٤ عساكرنا هجموا ع العدو زي الأسبود وبعدين الخيانة لعبت دورها بالأسلحة الفاسدة وبالهدئة . . وفي سنة ٢٧ القيادة كمان لعبت دورها . . هو اللي كان السبب في الهزيمة انما الرجالة كانوا زي الأسود وفيهم رجاله عملوا زي الأسسود واكتر . . وعشان كده أنا مش شايف فرق أبدا . . ولابد دول يندفنوا مع دول . .

عبد المال

_ مع احترامى لسمادتك انما الأخ عويس كمان حارب معركة خسرانة في التل الكبير ..

عرابي

- الخيانة كمان لعبت دورها يا عبد العال . . خيانة الخديوى والباشوات . .

(يقف احد لابس الاكان)

محمود يسن حاربت مع سعادتك في كفر الدوار . .

فية حاجه مهمة لازم نعرفها كلنا ويعرفها اولادنا اللي لسه بيحاربوا واللي لسه حا يحاربوا . . الخديوي . . الخديوي

والباشوات . وجيش ١٨ هزمته الخيانة الملك وأعوانه . والسياسيين والاضراب . وجيش ٢٧ هزمته القيسادة العسكرية الى مش فى مستوى المسئولية . . معنى كده كله . . انه لا يمكن البلد تقدر تحارب الا اذا كانت كلها يد واحدة عشان محدش يطعن جيشها م الخلف . .

صوت

ــ تبقى يد واحدة ازاى . .

معمود

- ما يبقاش فيها حكام ومحكومين .. ما يبقاش فيها واحد بيموت م الجوع وواحد بيموت م التخمة .. ما يبقلش فيها واحد ياكل لحد ما يطق وواحد يجوع لحد ما يفطس ..

عربلبي

- خلاص یا ابنی البلد ما عدش فیها باشوات ولا باهوات ولا ملك ولا أمرا ..

محمدود

- لا يا سعادة الباشا . . اللى يختشى من بنت عمه ما يجيبش منها عيال . . احنا فلاحين وعارفين كويس لما نقطع الشهرة م ع الوش جدورها بتطلع شجرة مطرحها . . انما لما نخلعها من جدورها ما تطلعش تانى . . الباشهوات والباهوات مش بالرتبة والأخلاق والنبة . .

عرابي

_ كلامك مظبوط يا محمود ...

معصود

_ یا سمادة الباشا . . العسکری لازم یکون ضهره محمی وهو هناك بیحارب بدمه . . (بقف احد لابس الاکفان ویتحدث)

عرابي

عوص

_ أنا عوض حسنين على أنا حاربت جيش لويس في المنصبورة واسرناه وطردنا المسليبين من ارضنا . . أنا عاوز أقول حاجه عرفتها م التاريخ . . ابن مصر لما بيستني في بلده لحد الأعداء ما يهجموا عليه بينهزم زي ما حصل مع الانجليز والفرنسيين واليهود . . انما لما بيهجم هو الأول بينتصر زى ما حصل في حطين ومرج دابق . . ليه احنا استنينا في سينا لما هجموا علينا ما هجمناش احنا الأول ..

عرابي

ـ على قد علمي دي كانت مسائل سياسية . .

عوض

ـ يا سعادة الساشا الحرب حرب والسسياسة سياسة . . الحرب دي لعب بارواح ناس وعرض ناس - . أنما السياسة شغل ع الورق . . أيش حاب لحاب . .

عرابي

- نرجع أوضوع قضيتنا .. فيه حد يحب يقول رأيه . .

(يقف أحد اليتين ويتحدث)

تېيل

ـ أنا نبيل سليمان قتلت في بور سميد سنة ٥٦ أنا رأيى أن الأخوان القادمين من سينا لا يندفنوا مع اخوانا اللي حاربوا سنة ٤٨ ولكن يندفنوا مع شهداء النضال ضد الاحتلال باعتبارهم شهداء وليسوا محاربين . .

(يقف اهد اليتي)

ـ حضرتك مين ..

عرابي

الميت

المت

بيسوهى ـ أنا بيومى عبد السميع أنا استشهدت في تورة أن المنطقة أن الأنجليز في ميدان الأزهر . احنيا قمنا ضد الاحتلال وماكانش معانا سلاح ووقفنا قدام المدافع والبنادق . .

ازاى اخوانا اللى قتلوا وهما بينسـحبوا يعتبروا زينا . .

(يقف احد الاموات)

انا مصطفى البشتيل استشهدت في مقدومة الاحتلال الفرنساوى في بولاق .. احنا نظمنا نفسنا وعملنا جيش كان كل سلاحه الطوب والعصيان وقدرنا نهزم الفرنسيين ونخليهم يهربوا بجلدهم ويجلوا عن بلدنا ..

(يقف احد الاموات)

- انا عبد الرؤوف مبارك . . انا استشهدت وانا باحظ لغم في معسكر انجليزي في الاسماعيليه سنة ٢٥٠ أنا ومجموعة من زمايلي . . كنا بنهاجم المسكرات البريطانيا احنا عدد قليل ما معناش سسلاح . . ازاى اللي قتلوا وهم ما حاربوش يبقوا زينا . .

عرابی ـ طب ورایک آیه . . اخوانک دول یندفنوا فین . . عبد الرؤوف ـ انا رایی دول شهداء صحیح انما دمهم فی رقبة اللی بعتوهم وبعدین قالولهم انسحبوا . . دول قتلی واللی فتلوهم معروفین . .

عرابي __ يمني يندفنوا فين . . عبد الروف __ مع شهداء حوادث القتل . .

هرابي

- اسمع یا عبد الرؤوف .. مانتاش شاعر آن کلامك ده انت واخوانك اللى سبقوك .. فیه جرح لشعور اخوانك اللى فقدوا حیاتهم .. وبعدین کل اللی طالبینه انهم یندفنوا هنا معاکم ..

عبد الرؤوف

بالعكس با سعادة الباشا . . اخوانا دول رجاله ولو خدوا فرصة عشان يحاربوا كانوا حاربوا زى الرجاله انما اذا احنا اعترفنا بيهم كمحاربين او شهداء معارك نبقى كانسا ادينا البراءة للمجرمين الحقيقيين . .

(يقف احد الاموات)

محفوظ

انا محفوظ عبد العاطى طالب فى الجامعة وغرقت على كوبرى عباس سنة ١٩٤٦ وكنت سعيد يوم ما جيت وقعدت مع الاخوان وكل ما أبص لمصر وهى بتكبر . . وتطرد المحتلين وبتتطور . . كنت اسعد انسان وانا باحس اناحلام جيلى والاجيال اللى سبقتنى كلها بتنحقق وفجاة لقيت يد قاسية نزلت على نافوخى ومن يومها وانا دايخ مش شايف حاجه عدلة قدامى . . باسأل نفسى أنا كنت عايش فى وهم كل اللى كان قدامى دا ماكنش صحيح . . امال ازاى . . ازاى دا حصل . . واللى حصل لازم فيه حد مسئول عنه ولازم يكون معروف مش ممكن جرائم زى ولا عيار انضرب نص الليل على واحد ماشى فى وسط المدرة . . لا . . لا . . لا . . .

عرابى ـ احدًا كلنا عايشين الماساة يا اخ محفوظ . . محفوظ . . محفوظ _ . . محفوظ _ . . محفوظ _ . . شايف يا باشا الناس بقت ازاى . .

بتسمع يا باشا عن الفلاسفة .. فلاسفة الهزيمة اللى طلعوا م الشقوق وعاوزين يعملوا م الهزيمة نظرية تاريخية .. تاريخنا اللى العالم كله طول عمره يبص له بغيرة وحسد بيقولوا فجأة بقى كله هزائم .. سمعت الأساتذة اللى بيقولوا ان مصر طول عمرها مستعمرة وانها طول عمرها ما حاربتش .. مصر اللى عمرها بتكافح وبتحارب .. سمعت يا باشا وقريت..

عرابي

- الهزيمة كانت قاسية وقسوتها زى انت مابتقول دوخت بعض الناس والدوخة بتخلى البعض يهمزى بكلام فارغ كتير انما دا لا يمكن يغير التاريخ . . ولا يمكن يخلينا نتخلى عن مبادئنا اللي عاوز يعرف تاريخ مصر صحيح ما يبصش للى عايشين يبصوا للى ماتوا . . يبص للى ماتوا هم فى الميدان بيحاربوا العدو . . ويبص للى الخيانة وبيحاربوا الطغيسان وبيحاربوا الخيانة وبيحاربوا الجوع فى كل المعارك

محفوظ

عرابي

_ يا باشا انت سامع كل حاجه ..

- عاوز أقولك كلمة يا أبنى أنت وأمثالك أللى بيزعزع أيمانهم كلام بيسمعوه . . مصر يا أبنى مش هى القاهرة وقهاويها ومجالسها . . مصر هناك في الفيط وفي المصنع . . مصر مش هي

اللى بتركب العربية .، مصر اللى لسه راكبه الجياد مصر مش هى اللى بتحسلم بالفئى والفلوس .. مصر دى هى اللى بتحارب وهى اللى بتتصر ..

محفوظ ــ أيوه يا باشا . . انما مصر التانية صوتها عالى بتشوش وتزعق وبتعرض نفسها على اللي هنا واللي هناك . .

عرابى ـ خلاص يا ابنى ماحدش عاد يقدر يفرض نفسه غير الحقيقة اللى بيدفع الثنن هو اللى من حقه انه يقود اللى بيقدم روحه من حقه بختار ساعة استشهاده . . وكمان قبره واذا كانوا اللى بيزعقوا مش حيمرفوا الجقيقـة دى . . حينداسوا لانهم بزعيقهم بيعطلوا جيش كبير قوى حيمشى ليومه ومصيره

محفوظ _ والمجرمين يا باشا . .

عرابى ــ حيروحوا فين .. مش م الحكمة انسا نسيب المركة داوقت ونقمد نحاكمهم انما لهم يوم ..

محفوظ ـ الشمب طيب بينسى . .

عرابی _ بنسی کل ده ..

محفوظ _ أرجو . .

عرابى ـ نرجع للقضية . . فيه حد فيكم يحب يضيف حاجه

(Y lat y(c)

اذن ترفع الجلسة للاستراحة وتعود للأنعقاد بعد ربع ساعة لاصدار الحكم .. (يقف عرابي ويقف الجمهور)

_ ســــــــــار _

اللوحة الثانية عشر

المنظر :

الحكمدار

الخير

الحكمدار

(الطريق المرصوف بالقرب من مقابر الامام .. الحكمدار والمامور والسكرتي والضابط يقفون .. الحكمدار قلق جدا يسبع في عصبية مدخنا . المامور قلق يرقب الطريق من بميد .. يشاهد المخبر يرتدى الكفن مقبلا من بميد . . يستحقه على الاسراع ...) المامور _ قرب شوية أهو جه أهوه ... (الحكمدار يتوقف . . بصل المغبر يحيطون به جميعا) - lus aalel lus .. الحكمدار _ خلاص يا سعادة البيه . . كلها خمس دقائق المخبر والحكم يصدر خلاص .. _ قول لنا بالتفصيل عملوا اله .. الحكمدار _ سعادة الباشا عرابي نظر القضية ورفع الجلسة المخبر للاستراحة وحيصدر الحكم حالا .. _ قالوا ايه . . مين اللي اتكلم . . انطق . . الحكمدار _ كلهم يا سعادة البيه . . كلهم اتكلموأ . . المخبر كلُّ واحد منهم قال رأيه ...

_ كلهم مين . . انت ما بتفهمش . .

الة ..

_ كلهم يا أفندم . . السادة الميتين كلهم اتكلموا . .

_ وانت رايح عشسان تقول لي اتكلم . . قالوا

- كله مكتوب يا سعادة البيه .. مكتوب .. ــ مكتوب . . المكمدار _ في الورق يا سعادة البيه . . جابوا واحد اسمه المخير الشيخ عبد الرحمن عمل كاتب جلسة وكنب كل حاجة ... الحكمار _ ومين الشيخ عبد الرحمن ده ؟ ــ ماعرفش يا سعادة البيه انما الظن كده انه المخبر م الففير .. ـ تمر فه قبل كده .. الحكمار ـ ما خدش في بالى يا سعادة البيه .. المخبر .. امال ایش عرفك انه من الفقي .. الحكمدار ـ أصل المدفونين في الامام ماعرفهـوش . قلت المخبر لازم كان مدفون في الفقير ... الحكمدار ـ مدفون . . ـ أيوه يا سمادة البيه .. المخير _ طب وحاتفيدنا بايه الحكاية دى .. الحكيدار المخبر _ اصل انا سمعيت الشيخ عبد الرحمن بيقول انه بعد ما الحكم يصدر حيدي أوراق القضية كلها للناس اللي لسبه عايشين عشسان يقروا .. ويسنتوعظوا . . ـ وبعدين حتمرف تجيبه . . المكمار ـُ أولَ ما يصدر الحكم يا سعادة البيه حاكشف المخبر عن شخصيتي واجيب الورق كله وتني جاي . . ۔ اوعی بروح منك .. الحكمدار المغبر - ازاى يا سمادة البيه ...

الحكمار ـ الورق دا بخبرك .. ـ حاضر يا سعادة البيسه . . ارجع أنا عشسان المخبر الحق ٠٠ الحكمدار - دوح ٠٠ (المخبر يبتعد وهو يرتعد من البرد ثم يتجه الى مجموعة من المساكر تقف غير بعيد ..) - حدش معاه بلو فر البسمه تحت الكفن . . الدنيا المخبر برد قوى والكفن خفيف .. ـ بلوفر .. عسكري (شاویش یخرج منجیب البنطلون جریدة یومیة عطبقة) ۔ خد حط دہ علی صدرك .. الشاويش _ هات الله يخليك .. المخبر (الخبر يتناول الجريدة ويدسها في صدره تحت الكفن ويملل نفسه ويسير)

ـ ســار ـ

اللوهة الثالثة عشر

المنظر :

الجبهة في الفنغة الفربية لقناة السويس بين الاسماعيلية وبور سميد خبّدت بمدفع مصوب الى الجبهة الشرقية عبر القناة .. بجوار المدفع جنديان احتجما يمسك بالمدفع والاخر بجواره .. بلوح من بعيد وعلى الضفة الشرقية مبنى عليه علم ..)

```
ـ سمعت اللي حصل في مصر . . .
                                             جندی ۱
                                              جندی ۲
                       _ أيوه سمعت . . .
                        ۔ عارف معناہ ایه
                                              جندی ۱
                            جندی ۲ _ عارف . .
                                              جندی ۱
                            ۔ وبعدین ..
                                           جندی ۲
                     ـ كل شيء له أوان ..
 _ أنا كل ما أكلمك تقول لى كل هيء له أوان ..
                                              جندی ۱
                              ــ أيوه . .
                                              جندی ۲
                            - أيوه أنه . .
                                              جندی ۱
                .. عشان ال شيء له أوان ..
                                           جندی ۲
                ـ وأوانه دا حابيجي امتى ..
                                              جندی ۱
                   ـ لما نبقى مستعدين . .
                                              جندی ۲
                                              جندی ۱
                               _ امتى . .
                                            جندی ۲
- الرجولة صبح انك تمسك اعصابك لمعد اليسوم
                             الموعود ...
```

_ امسك أعصابي ازاي . . انت شايف بيعملوا أنه جندی ۱ وسامع بيعملوا ايه هناك كمان ايه . . جندی ۲ - شايف وسامع زيك بالظبط .. جندی ۱ _ امال زي ما يكون ولا على بالك .. جندی ۲ _ دا المفروض . . ـ المفروض يبقى ولا على بالى ؟ جندی ۱ جندی ۲ ـ لا ٠٠ المفروض تبقى زى اللى ما يكون ولا على جندی ۱ ىالە . . چندی ۲ _ شايف العلم ده .. ـ بقى له سنة ونص شايفه . . جندی ۱ - بتشوفه وانت نام زبي .. جندی ۲ _ وأنا صاحى وأنا نايم .. باحس ساعات انه جندی ۱ مدفوس جوه مراوحي حيطبق عليها بخنقها .. جندی ۲ _ ظب ما تتصرف بقى . . جندی ۱ _ لو كانت الحكاية بسيطة كده . . كنا اتصر فنا جندی ۲ من زمان . . جندی ۱ _ امتى بس امتى . . جندی ۲ _ طول بآلك عن قريب .. جندی ۲ _ انت خت اجازات .. جندی ۱ _ مرة واحدة ونزلت البلد يومين . . جندی ۲ جندی ۱-ـ شفت الناس هناك .. _ ورجمت قلت توبة ومن يومها مانزلتش . . جندی ۲ ـ انا لفیت اجازتی .. مش نازل تانی انا زیك جندی ۱ رحت مرة واحدة ومشيت في الشارع وركبت الأتوبيس ودخلت المبيما . .

_ دخلت السيما كمان . . يا بختك . . حندی ۲ _ قلت ادخل يمكن أنسى . . جندی ۱ _ ونسيت . . جندی ۲ ۔۔ ایدا ۔۔ جندی ۱ _ كان فيلم ايه .. جندی ۲ _ كان فيلم يضحك .. جندی ۱ _ والناس كانت بتضحك .. جندی ۲ _ قوى زى ما يكون عندها تشسينج عصبى . . . جندی ۱ ضحكوا ع الحاجات اللي بتضحك والحاجات اللي ما بتضحكش . . ـ عاوزين يضحكوا وخلاص .. جندی ۲ _ زى الواحد اللي نفسه يسكر . . لو جبت له هندی ۱ مية ملونة وشربها حيسكر برضه .. جندی ۲ ـ عشان هو عايز يسكر .. _ عشان هو حاطط في دماغه أنه لازم يسكر .. جندی ۱ كمان الناس حاطه في دماغها انها لازم تضبحك وعشمان كده بتضحك - انما ليه أول ما يطلعوا من الفيلم . . كانهم عمرهم جندی ۱ ما ضحكوا تلاقي كل واحد راح مكبوس ومكشر .. _ بیرجعوا یفتکروا تانی . . چندی ۲ _ زى السكران أول ما يفوق . . يحس بالصداع جندی ۱ ويرجع يندم كمان عشان سكر . . جندی ۲ - بيندموا انهم بيضحكوا .. هندي - زى ما يكونوا بيعذبوا نفسهم بقصد . . بدخلوا

ويضحكوا وبعدين يفتكروا انهم ضحكوا فبزعلوا اكتر:.. _ ورحت فين غير السيما . . جندی ۲ _ أي حتة رحتها كانت الناس مالهاش سيرة غير جندی ۱ الموضوع ... _ طبعا حيتكلموا في ايه غير فيه . . جندی ۲ ــ كل اتنين يقعدوا مع بعض ويفتحوا اى موضوع جندی ۱ حتى لو اتكلموا في كحك العيد بعد خمس دقايق تلاقيهم بيتكلموا في الموضوع برضه .. ـ غلابة .. جندی ۲ ـ هم غلابة بعقل . . أنا صعبوا عليه خالص . . جندی ۱ .. وسمعت نكت هناك .. جندی ۲۰ ـ سمعت كتي . . جندی ۱ وزعلت الأول انما تعرف أنا لما فكرت فيها قلت ايه زى ما بيقولوا . . دى طبيعة الشعب المصرى . . چندی ۲ جندی ۱ _ أبدأ .. _ أمال اله ؟ جندی ۲ ـ كان في بلدنا راجل مستشيخ كده . . كان يمشي، جندی ۱ في الشارع ومعرى صدره وماسك في ايده حجر كبير يضرب على صدره به _ كان بيوجمه .. جندی ۲ _ لازم كان بيوجعه . . انما ماكانش بيقول آد . . جندی ۱ _ عشان هو اللي بيضرب نفسه حيقول آد له. . جندی ۲ _ اهم الناس في بلدنا كده .. بيقولوا نكت على جندی ۱

جندی ۲ ــ فکرك دا مظبوط ؟؟

جندی ۲

جندی ۱

جندي ١ ــ اللي قادرين عليه بيعملوه ..

ِ أصل كل واحد حاسس أنه مستول ..

عشان قالوا النكت وعشان ضحكوا عليها ..

جندی ۲ _ مش مظبوط ..

جندى ا _ مظبوط ولا مش مظبوط دا اللي حاصل . .

جندی ۲ _ طب و کانوا حیملوا ایه . .

جندی ۱ ____ بعملوا کتیر وعشان ما عملوش کل واحد حاسس انه مسئول ..

جندی ۲ __ فیه حاجات کتیر ماکانوش یعرفوها . . .

جندی ۱ ــ ماهم برضه مسئولین ۱۰۰ ازای ببقی فیسه حاجات کتیر ما یعرفوهاش ۰

جندی ۲ _ الناس معذوره برضه ..

جندی ۱ _ واحنا کمان معذورین . . آه یا ناری . .

جندی ۲ _ طول بالك كلنا مش عاوزين نتخم زی المره دوكها ٠٠

جندى ١ ــ اوعى تجيب سيره المره دوكها . . كفاية بقى .

جندی ۲ ــ لازم نجیب سیرتها عشان ما نقمش فیها تانی ۰۰

جندى ١ ــ والجماعة اللى طلعوا من سينا دول وراحوا مصر ٠٠٠ حيحصل لهم أيه ؟

جندی ۲ _ الله اعلم .. بس عملوا کده لیه ..

جندی ۱ __ قلقوا زینا . . فکرك دول مش عایشین معانا . .

ــ الأرواح عايشه في كل مكان . م	جندی ۲
_ مفیش روح بنهدا الا لما تاخد بالتار ساعتها	جندی آ
بس تستقر في التربه	چندی ۲
ـ ربنا يريحهم ٠٠	
- وكنا بنقول اللي مات ارتاح	جندی ۱
- يمكن طلعوا عشان يقولوا لنا انتوا غلطانين	جندی ۲
احنا مش مرتاحين ولا حاجة	3 4 4 4
۔ لا اللی ماٹ مرتاح ولا اللی عاش مرتاح	جندی ۱
ـ مفيش راحة الالما ناخه بدارنا	جندی ۲
ـ بس ۱۰ اسمع تيجي نضرب ۱۰	جندی ۱
(يستمد يحرك المدفع كانه سيفرب ويسرع زميله فيهسك	
بيده على المغع)	
- خليك عاقل ما تبوظش كل حاجة	جندی ۲
- انما الحكاية دى لها حدود	جندی ۱
- الرجاله بس هم اللي يقدروا عليها	جندی ۲
 والرجالة برضه تقدر تستتحمل لحد محدود 	چندی ۱
lab _	جندی ۲
ما تسيبنى افش غلى وأطفى النار اللي ف	جندی ۱
قلبي	
- مش وقته طول بالك	جندی ۲
(تمر لحظة صوت يرتفع صوت عسكرى من خندق	
مجاور یفنی)	
۔ یا لیل یا عین ۰۰	الصوت
۔ هو رجع يفني تاني ٠٠	هندی ۱
ــ من قلبه	جندی ۲
 سبع سواقی بتنمی لم طفولی نار 	المسوت
(يردد هذا القطع حتى ينزل الستار بطيئا)	
۔ سبع سواقی بتنعی لم طَّفُولی نار	الموت
9 ••	

اللوحة الرابعة عشر

(في مقابر الامام . . الجمهور يقف مجموعات . . الجنود الغمسة يجلسون على دكة متجاورين صامتين .. المخير يجلس بالقرب من الجنودا.. واضع أنه قلق .. يخرج من صدره الجريدة التي سبق أن وضمها ويبدأ في القراءة فيها . . المنصة خالية . . الحديث يعور في صوت مرتفع احد الجنود الخمسة يرى المخبر .. يميسل على زملاته . ويشير الى المخبر .. احدهم خميس يقوم ويتجه الى المخبر يقف امامه ويحدثه ..)

> _ مساء الخير .. _ مساء النور . . . المخير خميس

- (يشير إلى الجريدة التي بيده) الجرنال ده جديد ٠٠٠

(المخبر يقف مضطربا ويطوى الجريدة في يده وكانه قد ضبط متلبسا باحدى الجراثم . .)

المخبر ۔ آه . . دا جرنان يعنى . .

_ بتاع امتى . . خميس

بتاع النهارده واحدم الناس اللي لسه ماماتوش الخير اداهولي . .

ـ بقى لنا سنة ونص ما قريناش جرائد .. خميس

(المخبر محاولا التظاهر بالقسعك)

- احمد ربنا أنا بقى لى يبجى خمسميت سسنة المغير ما قریتش جراید خالص

ـ هو حضرتك ميت من خمسميت سنة 🎖 هميس ... الخيز

_ يوه واكثر . . بيجي الف . .

_ وكان عندكو جرايد . . خميس

_ طبعا أمال كنا بتعرف الأخبار منين .. المغبر _ غريبه . . أصل قالوا لنا في التاريخ . . خهيس _ (مقاطعا) المخبر تاريخ ايه يا عم . . انت بتصدق الكلام ده . خميس - على رأيك . ، تسمع . . (یمدیده) المخبر الجرنال . . (دون أن يقدمه) ـ بس اقراه أنا وزملائي .. أهو نعرف الاخبار خميس اللي مانعر فهاش _ (يقدم الجريدة) المخبر اتفضل اتفضل .. حاقراه واجيبهوولك على طول خهيس _ لا اتفضل .. المخبر (خميس يسبي وممه الجريدة . . الخبر يتحرك ليلوب بين الجمهور .. خميس يجلس في وسط زملاته وببدا في قراءة الصفحة الاولى ورءوس الجميع قد مالت عليسه تشاركه القراءة . . يدخل حد الرجال يحدث الوجودين .) _ الباشا خلاص وصل للحكم وجاى في السكه . . الرجل (الجماعة تزداد . . ثم تهدأ بعض الشيء . . بعض الافراد يتجهون الى القاعد ويجلسون . . الجنود الخمسة منهمكون في القراءة) عبد الففار ـ قرينوا .. ـ. يعنى ابتدوا خلاص . . خميس ـ احنا استمجلنا شویه . . محروس ـ انا مش قلت لكم كنا نستنى كام يوم كمان ... رضـوان _ ع العموم حصل خير ٠٠ شبوقي ـ باقول نقوم نرجع بقى . . عبد الففار

خميس _ مش نستني الحكم . . عبد الففار _ مالوش لازمه . .

(حَمِيس يضع الجريدة على القعد ويقف الحُمسة وفي نفس اللحظات يدخل عرابي فيقف من بالقساعة وينتهز الجنود المخمسة الفرصة ويخرجون دون أن يلتفت اليهم أحد . . عرابي يقف ويشير للجميع فيجلسون . . الجبرتي يجلس بجواره يدون)

عرابى - بسم الله الرحمن الرحيم . . فتحت الجلسة فين المتقاضين . .

(تقف مجموعة من الاموات ذوى الاكفان . . عرابي ينظر اليهم ويدور ببصره في القاعة بحثا عن الجنود الخمسة فلا يراهم . .)

عرابى _ فين اخوانا بتوع سينا ..

(لا يظهر أحد . . الجالسون يدورون في الكان بعثا عن الجنود الخمسة بأبصارهم ويرد أجد الاموات)

المیت ــ مش هنا ..

عرابی ـ حد بشو فهم بره . .

(يخرج احد الاموات ويثور اللفط بين الوجودين .. المخبر يظهر وهو مضطرب جدا .. يعود اليت من الخارج)

اكيت _ مش موجودين . .

عرابی ـ مش موجودین ازای . . راحوا فین ؟

(ويخرج بعض الاموات)

عرابي – مين آخر واحد شافهم هنا . .

(الغبر بتردد واخيرا يتقدم)

الخبر ــ أنا يا سعادة الباشا ..

عرابی _ شفتهم فین ۶۰۰

المخبر ـ جه واحد منهم وخد منى الجرنال وقعدوا هما الخمسة يقروا فيه وبعدين ماشفتهمش بعد كده . .

_ الجرنال جرنال ايه !	عرابي
(يضطرب)	الخبر
دا جرنال كان اداهوني واحسد من النساتس	
البعدا الصاحين	3 **
ــ وفين الجرنال ده ند مداه	عرابی
ــ خدوه معاهم المنال عدام المدم الدكة	المخبر
ــ الجرنال هنا سابوه ع الدكة د . ت . ف الحرية ماه مال و لا ما اما الو	صوت
(ميت يرفع الجريدة ويلهب الى فرابى ويسلمها له عرابي يقرأ الصفحة الأولى)	
ــ فين اخوانا بتوع سينا	عرابي
(عرابي يغتش ببصره في الصفحة الاولى والجميسع	
صامتون واخيرا يشرق وجهه ويرفع داسه)	
ــ هو لازم الخبر ده	عرابي
(یقرا)	•
اعلان قيام منظمة الفدائيين المصريين في سيناء قيام النظمة باعمال بطولية ضخمة .	
(يضع الجرنال)	
لازم الخبر ده هو اللي خسلاهم سيابونا	
ومشيوا	
(يدخل رجل من الخارج يصبح)	
ــ يا سيادة القاضي الجماعة قابلوني في السبكة	الميت
وقلولى أقول لسمادتك أنهم رجعوا سينا تانى وحيندفنوا هناك	
(همهمة متصلة يقطمها صوت عرابي)	
_ عرفوا انهم استعجلوا شویه رجعوایندفنوا	عرابي
في أرضهم ٠٠٠	
ــ بس تعبونا معاهم ٠٠	الميت
ـ بالعكس دى كانت فرصة علشانا كلنا وعشانهم	عرابي
کمان	177

... (يشير الى الصالة) الجبرتي وعشان اخوانا اللي لسه ما شرفوناش . . ـ تشطب القضية لتنازل احد طرفي النزاع .. عرابي (يقف عرابي ويقف الجمهور .. المخبر يتجه في سرعة الي الجبرتي) المخبر - تسمع تجيب المحضر .. الجبرتي . ـ عاوزه ليه . . _ (مشيرا الى الصالة) الخبر عشان اديهلهم يقروا ويستوعظوا .. انت منهم . . الجبرتي _ أنا ألله يسامحك .. بس أصل لنا ليه وأحسد المخبر قریبی فیهم ۰۰ ـ. خد .. الجيرتي (الجبرتي يطوى الاوراق ويسلمها للمخبر . . يتلقاها في فرح ويمود مسرعا ..) ـ اسمع . . الجبرتي (يقف المخبر ويتجه الى الجبرالي) سلم ع البيه المأمور .. ــ (وهو لا يفهم) شالله تسلم . . الخبر

للمؤلف

```
١ ـ ارزاق مجموعة قصمن قصيرة مطبوعات الشهر ١٩٥٨ ( نفدت )
                                                   ٢ ــ المعروسة
الطبعة الاولى - الدار القوميسة ١٩٦٢
                                   مسرحية
  الطبعة الثانية ـ الدار القومية ١٩٦٤
(نفتت)
                                                 ٣ ـ كفر البطيخ
   الطيمة الاولى ـ الدار القومية 1970
                                   مسرحية
                                                  ٤ ـ السبنسة
   مسرحية الطبعة الاولى ـ الدار القومية ١٩٦٦
   مسرحية الطيعة الاولى الكاتب العربي 1977
                                              ه _ كويرى الناموس
الطبعة الاولى الكاتب العربي ١٩٦٧ -
                                               7 ـ سكة السلامة
                                   مسرحية
( نفدت )
مسرحية الطبعة الاولى الكاتب المسبريي ١٩٦٧
                                                   ٧ ـ السيامير
( نفدت )

    ٨ ـ نادى النفوس المارية مجموعة صور الكتاب الذهبي ١٩٦٦ (نفدت)
```

تحت الطبع

مسرحية	في الكواليس	۔ کوابیس	٣	مسرحية	ا ـ الاســـاد
قمىمى قميرة	مجهوعة	_ یا بلد	£	مسرحية	۲ ـ يے السالم

التوزيع للداخل والخارج شركه توزيع الاخبار



WWW.BOOKS4ALL.NET

https://www.facebook.com/books4all.net